

**EKALESIA FAAPOTOPOTOGA KERISIANO I AMERIKA SAMOA**

**OFISA O A'OA'OGA KERISIANO**



**VASEGA MATUTUA**

**2023**

**TUSI VASEGA MATUTUA FEPUARI – IUNI, 2023**  
**FA’ASOLOGA O MATAUPU O LE TUSI.**

<b><u>ASO /MASINA</u></b>	<b><u>MATAUPU</u></b>	<b><u>TUSI FAITAU</u></b>
1. Fepuari 05, 2023	“O le savaliga o le ola” <i>(The walk of life)</i>	Luka 18:31 – 19:10
2. Fepuari 12, 2023	“Fa’atinoina o tiute tauave” <i>(Taking responsibility)</i>	Esekielu 18:1-17
3. Fepuari 19, 2023	“Ua tumu le lalolagi i laei o le Atua” <i>(God's robe fills the earth)</i>	Isaia 6:1-5
4. Fepuari 26, 2023	“SUEGA MUAMUA”	
5. Mati 05, 2023	“Ia ta’ita’iina e le Agaga” <i>(Spirit Lead)</i>	Luka 4: 1-13
6. Mati 12, 2023	“Lu’i le ola fa’afoliga” <i>(Challenging hypocrisy)</i>	Luka 6: 37-45
7. Mati 19, 2023	“Ia manatu oe i se mea lelei ua e faia” <i>(Remembering you of a good deed)</i>	Mareko 14: 3-9
8. Mati 26, 2023	“SUEGA LONA LUA”	
9. Aperila 02, 2023	“O tala maa’i i le tino” (Aso Sa Laupama) <i>(A thorn in the flesh)</i>	2Korinito 12:7-10
10. Aperila 09, 2023	“E le o le Malosi” <i>(Not by Power)</i>	Roma 6: 1-14
11. Aperila 16, 2023	“Tupu ma ola i le Agaga” <i>(Living by the Spirit)</i>	Kalatia 5: 16 – 26
12. Aperila 23, 2023	“E tasi uma ia Keriso” <i>(All one in Christ Jesus)</i>	Kalatia 3:23-29
13. Aperila 30, 2023	“SUEGA LONA TOLU”	
14. Me 07, 2023	“Sau ma ave e tusa ma lana e mana’omia” <i>(Come and take as you need)</i>	Esoto 16: 1-18
15. Me 14, 2023	“Ua aveese le tofi masiofo” (Aso Sa o Tina) <i>(Queen Vashti deposed)</i>	Eseta 1: 1-20
16. Me 21, 2023	“Manumalo mai tumutumu mauga” <i>(Victory from the mountain top)</i>	Esoto 17: 8-16
17. Me 28, 2023	“Tasi i le Agaga ma Fa’atalitali” <i>(One in Spirit and Waiting)</i>	Galuega 2:1-21
18. Iuni 04, 2023	“Fai fuafua i le malosi” <i>(Dont wear yourself out)</i>	Esoto 18: 13-27
19. Iuni 11, 2023	“Manava ola a le Atua” <i>(God’s breath)</i>	Salamo 33
20. Iuni 18, 2023	“Tele mea tou te nonofo ai” <i>(Manu dwelling place)</i>	Ioane 14: 1-7
21. Iuni 25, 2023	“SUEGA O LE AFA TAUSAGA”	

**Manuia le malologa o le afa muamua o lenei tausaga, Iulai 02, 2023 -----Iulai 30, 2023.**

## **ASO SA FEPUARI 05, 2023**

### **MATAUPU 1: “O LE SAVALIGA O LE OLA” (The walk of life)**

**TUSI FAITAU:** Luka 18:31-- 19:10

**SINI:** Ia malamalama le vasega o le savaliga a Iesu ma ona so'o I Ierusalem, o le savaliga o le ola mo e na mana'omia le fesoasoani.

#### **FESOASOANI MO FAIAOGA:**

E fa'atalofa atu i a outou susuga i faiaoga o le vasega matutua i le amataga o lenei tausaga fou ua tatou aulia. Talitonu lava ua outou maua se malosi fa'asili mai le Atua e tusa ai o le malologa sa tatou i ai. Manatu foi sa maua se Kerisimasi fiafia ma se Tausaga Fou manuia i le alofa ma le agalelei tausi o le Atua. Ae saga'i ane loa ai o le tai ae a le toe amatalia o tiute ma galuega fa'afaiaoga Aso Sa o lenei tausaga. E tatau lava ona fa'amanatu pea i tamaiti mea e ao ona aumai e fa'aoga i le taimi o le vasega. Ia lava pea le taimi mo le tatou tusi faitau ua tu'uina atu e faigofie ai la outou galuega.

#### **FESOASOANI MO LE MATAUPU:**

O lea ua aga atu Iesu ma ona so'o i Ierusalem, ma ua Ia ta'utino foi le mea o le a tupu i Ierusalem. O le savavali ai la o Iesu ma ona so'o i Ierusalem, o le savaliga e tau i puapuaga ma le maliu o Iesu. O le savaliga ua fa'atusa i le savaliga a tagata sulufa'i Eperu i le feagaiga tuai, lea e latua te savavali ai ma usu le pese o le o a'e i Ierusalem. O lo'o fa'amauina i le tusi o Salamo 25 – 30. O le fa'amoemoe o le 'au sulufa'i e fia maua le ola o lo'o i Ierusalem. O le savaliga la a Iesu ma ona so'o, o le savaliga e tau I puapuaga ma le oti. Peeita'i, o le savaliga lea o le ola e le iloa e le 'au so'o. Lea la e amata atu ina ua Ia fa'amalolo i le tauaso aemaise ai o le fa'aolataga mo le aiga o Sakaio le ao lafoga.

Fuaiupu 35-43, O le savaliga a Iesu na ui atu e latalata i Ieriko ae fa'alogo ane ai le tagata tauaso o ta'uta'u le suafa o Iesu. Na vavao e so'o lenei tauaso, peita'i na atili ai ona tau valaau lenei tagata. O le tauvalaau a le tagata fa'atuatua, a'o le fa'atuatua na tupu ane i le na o le fa'alogo i mea na faia e Iesu. O le molimau o lenei tauaso sa nofonofo i le ala, ai lava o le musumusuga lea a le Agaga i lona fa'atuatua lea na alu ane nofo i le ala. Lea la ua talafeauga ma le savavali mai o Iesu ma ona so'o. O le fa'aailoga o le tagata ua saili ma le fa'amaoni i le Alii. Ae le'i faigata foi ia Iesu ona ia iloa le fa'atuatua o lenei tauaso.

O Sakaio o le Iutaia mao'i sa faigaluega i lalo o le malo o Roma, o ia o se Ao Lafoga sinia. O se tagata pu'upu'u i ona foliga vaaia. O le tagata ua fa'alupe o le tagata mauoa. O Ieriko o le isi lea a'ai e tuta iai va'a feoa'i i le vaitafe o Ioritana. So'o se tagata fou a la e taunu'u, e totogi lana lafoga ia Sakaio. E le gata o le lafoga ulufale ae fa'apea foi i le lafoga mo aso uma. Afai a la e fa'asili le lafoga ulufale ma lafoga I aso ta'itasi mo lea tagata fou, a ua le tasi foi ni tagata e autova'a atu ma nofonofo i Iutaia. O lona uiga e fai a la si tele o le tupe o lo'o alu i le taga a Sakaio.

Na a'e Sakaio i le Sukamoru, ona o le fia maimoa i le tagata e suafa ia Iesu. O lona pu'upu'u na leiloa atu ai e Iesu, a'o le ata foi lea o le tagata Iutaia o lo'o leiloa i le tala lelei. Fa'amoemoe lea o le tusi o Luka, o le Iesu na sau e saili ma fa'aola mamoe o le aiga o Isaraelu ua leiloloa. O le a'e la a Sakaio i le Sukamoru, o le a'e a le tagata mauoa i le oa fa'aletino ae o lo'o leiloa i le tala lelei. Ana le a'e Sakaio i le laau e le maua e Iesu le isi mamoe o Isaraelu o lo'o leiloa fa'aleiloga ai a i totonu o Iutaia. O luga o le Sukamoru na iloa atu ai e Sakaio le fa'aolataga mo lona aiga. O luga

foi o le Sukamoru na to'ulu ese ai lona tamaoaiga fa'aletino, a ua fa'aofu e Iesu i le tamaoaiga fa'a-le-agaga.

Ioe tamaiti, mea ia na tutupu i le savaliga a Iesu ma ona so'o e aga'i atu i Ierusalema. O le savaliga na maua ai e le tauaso le ola fou ina ua ia vaai i le lalolagi matagofie, ae le gata i lea o le savaliga na ola ai le aiga o Sakaio ina ua latou maua le fa'aolataga. Ia ma le ute o faigamea, o le savaliga lea na tau i Ierusalema ma fasiotia ai ina ia ola le lalolagi agasala.

### **A'oa'oga:**

1. Ua na'o Iesu tatou te maua ai le ola.
2. E tali Iesu i o tatou mafatiaga.
3. O lo'o saili mai pea Iesu i o tatou tagata.

### **Galuega Fa'atino: Tusitusiga pu'upu'u**

1. Toe fa'amatala mai tala e lua o lo'o i totonu o le tusi faitau sa faitauina, ma ni mea taua sa tutupu ai. (ia i le va o le 200 – 300 upu)
2. O lenei galuega fa'atino e tuliloa ai le faitau ma le fa'alogo a le fanau, aemaise o le a'oa'oina pea I le fa'apu'upu'uina o tala. (Summarising)

**PESE:** Sakaio se tagata pu'upu'u sa'asa'a, le tagata pu'upu'u sa'asa'a  
Sa a'e o ia i le Sukamoru, i tafatafa o le auala  
O Iesu ua Afio mai, tu loa ma fetalai  
Sakaio, alu ifo nei i lalo  
Sau ta o i lou fale  
Ua tele lou fia ulavale.

Fa'afetai mo le galuega o lenei Aso Sa e pei ona feagai ai ma outou, ia fa'amanuia tele le Atua. Ia saunia e lau susuga se tatalo e fa'auma ai le vasega.

### ***IA MANUIA LE ASO SA!!***

\*\*\*\*\*

### **ASO SA FEPUARI 12, 2023**

**MATAUPU 2: “FA'ATINOINA O TIUTE TAUAVE”** (Taking responsibility)

**TUSI FAITAU:** Esekielu 18: 1-17

**SINI:** Ia malamalama le fanau, o le fa'amasinoga amiotonu a le Atua, e fa'asino tonu lava I le tagata ma lana fa'atinoga, pe lelei pe le lelei foi.

### **FESOASOANI MO FAIAOGA:**

Malo le fa'amalolosi fa'afetai foi le onosa'i i galuega sa feagai ai ma outou o le vaiaso ua mavae atu. Ia fa'amalosi pea o outou loto e fiafia e galulue i lenei galuega aua e le vale lo outou tau mai le Atua le matai o le galuega. Ia tumau pea lo outou fa'amaoni e ala i le faitau pea o le tatou tusi faitau e faigofie ai ona fa'amatala le mataupu. Ia manuia le tapenaga.

### **SINA FESOASOANI MO LE MATAUPU:**

O le tatou mataupu o lenei taeao, “FA'ATINOINA O TIUTE TAUAVE” O le upu tiute, o matafaioi ma galuega fa'atino ia e patino i le tagata lava ia. Fa'ata'iat'iga, o matua, ia po'o le Tama

ma le Tina. O o la tiute tauave, o le tausia ma le va'aia o le fanau. A'oa'o ma fa'atonu le fanau i ala o le Atua, ma ia fa'amaoni i la la'ua tautoga na faia i luma o le Atua.

O le Faifeau, e ao ona fa'amaoni e folafola atu le tala lelei a le Atua ma ta'ita'i tagata uma i le Atua, e aunoa ma le fa'aitu'au pe iai foi nisi amioga e le tusa ai ma le finagalo o le Atua.

E o'o foi i faiaoga, pe faiaoga o le aoga Aso Sa, pe faiaoga foi i aoga palagi, e ao lava ona fa'atino ona foi tiute, e tusa ma aiaiga o lona valaauina. Ia faia ma le fa'amaoni ma ia fa'alogo pea i le fa'atonu mai o le Agaga o le Atua.

O tatou foi le fanau, e iai foi o tatou tiute fa'a-fanau e ao ona fa'atino. O lo tatou tiute o le fa'alogo ma usita'i. Ia ava ma mata'u i le Atua, ma ia fiafia i le aoga Aso Sa ma le lotu. Ia fa'amaoni i le faiga o a tatou meaa'oga, ma fa'amaoni i le fa'atinoina o feau e fa'atonuina ai i tatou e o tatou matua.

Aua, pei o le feau lea (o lea) e folafola atu e le Perofeta o Esekielu i tagata o le nu'u o le Atua, po'o tagata o Isaraelu, a'o iai i latou i Papelonia ona o le tafeaga. O lea ua amata lava le mataupu e 18, i le fesili a le Atua e ala atu i lana auauina, mo tagata o lona nu'u. Po'o ai na fai atu a 'ai e matua le vine moto, ona magiagia ai lea o nifo o le fanau. Aua o le talitonuga lea o Isaraelu na o latou manatu ane ai, ua mafua ona fa'atafea ma ola pologa Isaraelu po'o ituaiga e 10, ona o le agasala a Reopoamo. Ae ua mafua ona tigaina ma pologa Iuta, ona o le agasala a Iuta ma Peniamina. O le manatu lea o lea ua afua ai ona fesili le Atua. i le finagalo o le Atua, o ia e faia le fa'amasinoga, ma o lana fa'amasinoga foi e amiotonu lava. Ae o lea ua foliga mai i lenei fa'aupuga, ua tu'umaulaloina ai lona tulaga Atua ma lana fa'amasinoga amiotonu. Ma ua foliga mai ai o ia o se Atua sau ma le alofa.

Lea la ua fofola atu e le Atua le fala e auala atu i lana Perofeta ma fa'ailo i lona nu'u le sese o lea manatu. E pei ona ta'ua i le fuaiupu e 4-13, ua fetalai mai le Atua, 'Fa'auta o agaga uma, o o'u lava i latou, e pei o le agaga o le Tama ona fai mo'u, e fa'apea foi le agaga o le atali'i; o le tagata agasala, e oti ia. Ae afai e amiotonu le tagata ma ua faia le amio e tatau ma le amiotonu; e ola lava ia.' O lea ua fa'amanino mai e le Atua, e leai se mea o le a afaina ai fua le isi tagata, ona o le agasala a le isi tagata. O le uiga o lea manatu, afai lava e amio leaga le tama ma le fa'alogo i le Atua, e i luga lava o ia ona leaga. Ae afai e fa'alogo ma usita'i le atali'i, ma mata'u i le Atua, e i luga foi o ia ona manuia.

O lona uiga la, o le fa'atinoina o tatou tiute tauave, e ao lava ona faia ma le fa'amaoni ma usita'i i le fa'atonu mai o le agaga o le Atua. Aua o le mea ua mautinoa e tusa ma le tusi faitau o lenei aso, e le mafai ona galulue o tatou matua ae manuia ai tatou le fanau. E fua lo tatou manuia, ina ua fa'atino fa'atasi o tatou tiute ma o tatou matua. O le uiga o le manatu, e mafai ona manuia a tatou taumafaiga ma i'u lelei a tatou aoga, ina ua fa'atino la tatou pito laau, o le to'a'aga e fai a tatou meaa'oga, ma to'a'aga e tatalo ma le fa'atauina i le Atua. Ia fa'amaoni foi ona tatou saili atu i le Atua i taimi uma. Afai tatou te faia fa'apea, ona le taumate lea o le i'uga manuia o o tatou olaga.

Aua e fiu lava le Tama ma le Tina e tatalo ma totogi lou pili ma ave oe i le aoga ina ia manuia lou olaga, ae afai na o le tafao lava ma faifai telefoni, ma le moe lau mea e fai, e le mafai lava ona i'u manuia lou taumafai. E pei foi ona faimai le Aposetolo o Paulo, "O outou le fanau, ia outou fa'alogo i o outou matua i le Alii." O lona uiga, ia tatou fa'alogo ma usita'i i o tatou matua, aua o le finagalo lea o le Alii le Atua. Manatua, o le fa'atinoga o tatou tiute tauave fa'afanau, e fa'amoemoe i le fa'atonu mai o le agaga o le Atua.

**A'oa'oga:**

- 1. Ia fa'amaoni i le faiga o meaa'oga.
- 2. Ia tatou alolofa i o tatou matua.
- 3. E tau mai i tatou e le Atua, e tusa ma a tatou fa'atinoga.

**Galuega Fa'atino: Tali mai fesili nei**

1. O le a foi le muagagana fa'a-Iutaia lea ua fa'asese e le Atua?

**Tali:** E 'ai e matua le vine moto, ae magiagia ai nifo o le atali'i.

2. O le a le finagalo o le Atua i lea mau e pei ona ta'ua i le mataupu?

**Tali:** E i luga lava o le tagata lona tau e tusa ma le fa'atinoina o ona tiute tauave.

3. O a o tatou tiute fa'afanau e pei ona fa'amatalaina i le tala?

**Tali:** O le usita'i ma fa'alogo, to'aga i le aoga, alofa i matua ma alofa i le Atua.

4. Tauloto fa'atasi mai le tulafono e lima.

**PESE: #380: Pese ma Viiga**

Fa'afetai mo le galuega sa fitaituga ai i lenei taeao, ia fa'amanuia tele le Atua i fuafuaga o lenei Aso Sa. Ia fai se tatalo e fa'auma ai le vasega.

***IA MANUIA TELE LE ASO SA!!***

\*\*\*\*\*

**ASO SA FEPUARI 19, 2023**

**MATAUPU 3: "UA TUMU LE LALOLAGI I LAEI O LE ATUA"**(God's robe fills the earth)

**TUSI FAITAU:** Isaia 6: 1-5

**SINI:** Ia malamalama le fanau e iai le Atua i mea uma, ma ua tumu ai le lalolagi i lona mamalu ma lona silisili ese.

**FESOASOANI MO FAIAOGA:**

Fa'amalo atu lava le tauata'i i feau ma galuega ua valaauina i ai lo outou soifua ma lo tatou ola e le Atua. O le tatou ato lava e fevailia'i ma la tatou avega e tausoa fa'atasi, ma o le taulogologo lava foi e tupu ai manatu ma lagona lelei ae a la tatou galuega fai fa'atasi. Talitonu lava le manatu e le faigofie la outou galuega, ae tatou te fa'alagolago lava i le Atua na te fesoasoani mai i lo tatou vaivai. O le mea lea, e tatau ai ona lava pea lau mafuta i le tusi faitau a'o le'i o'o i le taimi e fa'amatala ai le mataupu. Ia manuia le tapenaga.

**FESOASOANI MO LE MATAUPU:**

O le Atua lava ia e ao ona viia e tagata ola uma, aua o le Atua e mamalu ma Paia. O le Atua o le ola ma le puna o fa'amanuiaga. O le Atua e silisili ese e tumau e leai sona gata'aga. O le Atua e lae'i i viiga ma le fa'ane'etaga.

O le vaega o le tusi na faitauina, o lo'o fa'ailoa mai ai ni vaa'iga mata'utia na vaa'i iai le Perofeta o Isaia. Ua mavae atu le tupu o Usia talu lona ma'i lepela ina ua ia taumafai e faoa le tulaga o le ositaulaga. (2 Nofoaiga a Tupu 26:18-21). Ae o se vaaiga uiga ese ma le mata'utia na iloa e Isaia i totonu o le malumalu, lea na ta'utino ai e Isaia lona fa'atauva'a i luma o le Atua. Na vaaia e Isaia le Atua i lona nofoalii mamalu, fa'atasi ai ma agelu po'o serafi, o lo'o vivi'i ma fa'apea ane e paia,

e paia, e paia le Alii o 'au, ua tumu le lagi ma le lalolagi i lona mamalu, fa'atasi ai la ma le asu ua fa'atumuina atoa ai totonu o le malumalu. O le fa'aailoga ua tumu le malumalu i le paia ma le mamalu o le Atua.

E matua maoa'e le vaa'iga na iloa e Isaia, a o lona foi lea valaauina e fai ma ave feau po'o le Perofeta a le Atua, e fa'aailoa lona finagalo i lona nu'u. O le alu ane ai la o le agelu ma le malala ola ma tu'u i laugutu o Isaia, o le fa'aailoga o le fa'apaiaina lava lea ma le fa'amamaina o agasala a le Perofeta aua le sauni atu mo le galuega a le Atua. E ui i se fa'atauva'a o le tagata, ae na maua le malosi ma le to'a mai le Atua e fa'atino ai le galuega e pei ona valaauina ai o ia e le Atua. O le ala lea na ia fai atu ai e auina atu o ia i le feau ma le galuega a le Atua.

Ioe tamaiti, o 'i foi lea ua a'oa'oina ai i tatou, e leai, leai lava se isi ala tatou te maua ai le to'amalie ma le malosi, ua na'o le Atua lava e to'atasi tatou te maua ai mea lelei uma. O lo tatou tiute, o le faia lea o le finagalo o le Atua, a'o le Atua na te fa'a-tamaoigaina ma fa'a-auupegaina i tatou mo feau ese'ese ma tiute ua valaauina ai tatou e Ia. Ia tatou fiafia pea e ola vivi'i ma tapua'i i le Atua, aua o le upu moni, ua tumu le lalolagi i le mamalu ma le paia o le Atua. E pale foi ma lae'i o Ia i vi'iga.

### **A'OA'OGA:**

1. Ia fiafia e auauna ma vivi'i i le Atua.
2. E iai le Atua i so'o se mea.
3. O le alofa o le Atua e fa'asafua mo tagata uma.

### **GALUEGA FA'ATINO: Fesili fa'atupu manatu**

1. O le a se vaa'iga na iloa e Isaia i totonu o le malumalu?

*Tali: Na vaaia e Isaia le Atua i lona nofoalii fa'atasi ai ma agelu po'o kerupi, ma le asu ua fa'atumuina ai totonu o le malumalu.*

2. O le a se fa'aailoga o lo'o aumai ai i ia mea?

*Tali: O le fa'aailoga ua tumu le malumalu i le paia ma le mamalu o le Atua.*

3. O le a le uiga o le malala ola na tu'uina e le agelu i laugutu o le Perofeta?

*Tali: O le fa'aailoga o le fa'apaiaina ma le fa'amamaina o agasala a Isaia ae sauni e fai le galuega a le Atua.*

4. O le a le tiute a le tagata e tusa ai ma le tala?

*Tali: O le faia lea o le finagalo o le Atua, a'o le Atua na te fa'a-tamaoigaina le tagata.*

### **Pese: O ai ea lo tatou ola (Pese ma Viiga 385)**

Ia tofia e le faiaoga se tamaita'i e fai se tatalo ma fa'auma ai le vasega.

\*\*\*\*\*

### **ASO SA FEPUARI 26, 2023**

#### **MATAUPU 4: "SUEGA MUAMUA"**

**SINI:** Ia su'esu'eina pea mafaufau o le fanau ina ia le gata e manatua pea, a ia olaola foi i o latou loto tala o le Tusi Paia o lo'o a'oa'oina ai i latou.

**FESOASOANI MO FAIAOGA:**

Malo lava le fa'amalolosi, lea ua tatou taunu'u mai i le Aso Sa mulimuli o lenei Masina. E fautuaina pea le fa'ataunu'u ona fai o a tatou suega mo Masina ta'itasi ae pule lava outou i le faiga e fai ai. A mana'omia foi le sui o fesili pe fa'aopoopo foi ia o le faitalia lava lenei a faiaoga.

**Fesili ma Tali:**

1. "Savaliga o le ola" o le a le uiga?

**Tali:** *O le savaliga a Iesu i Ierusalem lea ua maua ai le fa'aolataga mo tagata uma.*

2. O ai sa fa'amaloloina e Iesu e tusa ai ma le tala?

**Tali:** O le tagata tauaso ma Sakaio le ao lafoga.

3. O fea le nu'u o Sakaio a o fea foi le malo na galue ai?

**Tali:** O Sakaio o le Iutaia mao'i ae sa galue i lalo o le malo o Roma.

4. O le a foi le fuaitau fa'a-Iutaia lea ua fa'asese e le Atua?

**Tali:** E 'ai e matua le vine moto, ae magiagia ai nifo o le fanau.

5. O le a le mea sili i le Atua?

**Tali:** O le faia o mea uma ma le fa'amaoni ma le loto malie.

6. O a tiute o le fanau e tatau ona fai e pei ona ta'ua i le tala?

**Tali:** Ia usita'i ma fa'alogo, to'a'aga e fai meaaoga, ia alofa i matua ma ia alofa foi i le Atua.

7. O le a le uiga o fa'aliga lea na vaaia e Isaia i totonu o le malumalu?

**Tali:** O le fa'aailoga o le paia ma le mamalu o le Atua.

8. O le a le uiga o le malala ola na tu'uina e le agelu i laugutu o le Perofeta o Isaia?

**Tali:** O le fa'aailoga o le fa'apaiaina ma le fa'amamaina o agasala a Isaia ae sauni mo le galuega.

9. O le tagata e valaauina i le galuega tala'i e tatau ona fa'apaiaina e le Atua. E Sa'o pe Sese?

**Tali:** Sa'o

10. Tusi mai ia le silia ma le lua parakalafa e fa'amatala mai ai ni a'oa'oga na e maua mai i le manatu o lenei Masina.

Fa'afetai lava mo le galuega o lenei Aso Sa. Ia manuia le alo atu i sauniga ma fuafuaga o le Aso Sa aemaise le vaiaso. Ia sania se pese ma fa'ai'u le vasega i le tatalo.

**IA MANUIA TELE LE ASO SA!!**

\*\*\*\*\*

**ASO SA MATI 05, 2023**

**MATAUPU 5: "IA TA'ITA'INA E LE AGAGA"** (Spirit lead)

**TUSI FAITAU:** Luka 4: 1-13

**SINI:** Ia malamalama tamaiti o tagata ua mafutaina e le Agaga, e ta'ita'ina foi e le Agaga i le ala sa'o e ui ai.

**FESOASOANI MO FAIAOGA :** O le mataupu o lenei Aso Sa, 'IA TA'ITA'IINA E LE AGAGA' Talitonu lava o lo'o manuia mea uma e ala i le ta'ita'iga a le Agaga i lo outou soifua ma



lo tatou ola. O le tatalo atu foi, ia fa'amoemoe foi lau sailiga ma le tapenaga i le ta'ita'iga a le Agaga e faigofie ai la outou galuega. Maua pea lo outou loto tetele aua le fa'atinoina o la outou pitolaau. Ia manuia le galuega o lenei Aso Sa.

### **FESOASOANI MO LE MATAUPU:**

O le masani a o tatou tagata Samoa, so'o se fa'amoemoe lava e fa'ataunu'u, e amata lava i le lotu po'o se tatalo foi. O le fa'amoemoe ma le talitonuga aemaise o le tatou mau tauave, o Samoa e muamua le Atua i mea uma. O le masani foi lea a Iesu a'o feagai ma lana galuega fa'aola, e muamua lava ona ia tu'umuli i se nofoaga tu'ufua e tatalo ai i lona Tama se'i aumai le malosi e fai ai le galuega.

I le tala lea ua aumai ai le mataupu o lenei Aso Sa, o le tala i le fa'aosoosoina o Iesu ma lona manumalo i le tiapolo. O lo'o ta'ua uma e Mataio ma Luka le tala lea, peita'i e iai lava le mea e ese'ese ai i fa'ai'uga o la fa'amaumauga. O le tala foi ua fa'alogo so'o ai le fanau, ae ao lava ona fou pea lona fa'amatalaina. I le tala a Luka, o lo'o amata lava i le fa'apea mai, 'Ua foi a'e Iesu mai Ioritana, ua tumu o ia i le Agaga Paia, ona ta'ita'iina lea o Ia e le Agaga i le mea tu'ufua, ua fa'aosoosoina e le tiapolo i aso e fa sefulu. Ua tatou manino uma i fa'aosoosoga na o'o i a Iesu ma manumalo ai. O le manumalo o Iesu, na ia maua e ala i le ta'ita'iga a le Agaga Paia o le Atua.

I le fuaiupu e 13, fai mai, 'Ua fa'auma e le tiapolo le fa'aosoosoga uma, ona alu ese ai lea ia te ia sei'a i se aso.' O le mea o lo'o manino mai I le fuaitau lea, e ui ina fa'auma e le tiapolo le la finauga, ae o lo'o sau ai ma le tala 'sei'a i se aso' O lona uiga, e le o malolo le tiapolo, o lo'o fealua'i pea i le lalolagi e o'o mai lava i le taimi nei. O le mea lea e ao ai lava ona tatou mataala i taimi uma, ma ia tatou iloa, o le manumalo o Iesu i le tiapolo, o le tatou manumalo fa'atasi lava lea, pe afai tatou te talia ma le mautinoa le mafuta mai o le Agaga Paia o le Atua ia'i tatou ta'ito'atasi. O le Agaga Paia o le Atua, o le tatou au'upega sili lea, e mafai ai ona tatou tete'e atu i fa'aosoosoga e o'o mai i a'i tatou. Ae tatou te maua le Agaga, pe a tatou tatalo ma le loto fa'amaoni i le Atua e fesoasoani mai mo i tatou, e leai se mea e faigata i le Atua. E manuia foi so'o se tatou taumafaiga, pe a ta'ita'iina tatou e le Agaga Paia.

### **A'OA'OGA:**

1. Ia tatou mataala ma tatalo e le aunoa.
2. Tatou te manumalo i fa'aosoosoga pe a ta'ita'iina i tatou e le Agaga Paia.
3. Aua e te alu na o oe, a 'ia lua o ma le Agaga Paia.

### **GALUEGA FA'ATINO:**

1. Ia fai sina fa'atinoga pu'upu'u o le tala lea sa fa'amatalaina, ina ia fa'aoga pea e le fanau, e tali atu ai i le tele o fa'aosoosoga o lo'o feagai ma tupulaga i lenei vaiata.
2. Manuia foi ae mafaufau i se fa'afitauli o lo'o malosi ai le a'afia o tamaiti ma o latou olaga.

**Pese:** Alaga le si'ufofoga o le leoleo mamoe

I fafo le pogisa po'o fea o iai

Ua valaau e mamoe ua leiloa

Ua mamao ma le leoleo mamoe.

**Tatalo: Ia fa'ai'u e le Faiaoga le vasega i le tatalo.**

## **ASO SA MATI 12, 2023**

### **MATAUPU 6: “LU’I LE OLA FA’AFOLIGA” (Challenging hypocrisy)**

**TUSI FAITAU:** LUKA 6: 37-45

**SINI:** Ia malamalama tamaiti i a’oa’oga a Iesu o loo aumai e le tusi faitau e uiga i le tatou mataupu.

#### **FESOASOANI MO FAIAOGA:**

Fa’atalofa atu foi i lenei aso fou ua maua i le alofa ma le agalelei tausii mai o lo tatou Atua. Fa’amalo foi le pale i tiute ma galuega sa feagai ma outou, talitonu o lo’o sologa lelei pea mea uma e ala i le faatinoina o la outou foi pitolaau faa-faiaoga Aso Sa. Ia taumafai pea e fa’aauau le faamatalaina o mataupu ina ia o fa’atasi ma le manatu ta’ita’i o le Masina. Ia manuia le tapenaga.

#### **FESOASOANI MO LE MATAUPU:**

O uiga uma lava e fa’aalia o le tagata, e mafua ma fa’apogai uma mai i le loto, a lelei le loto e lelei foi mea e fai, ae a leaga le loto ua leaga foi mea e fai e le tagata. O le ola fa’afoliga, o uiga ia na atagia i le olaga o le au faresaio ma le au tusiupu i le taimi o Iesu ma lana galuega fa’aola. O ni tagata e teuteu lumafale ae fa’aletonu le ‘anofale, e lelei mai i le vaa’iga o mata a’o totonu o le loto o lo’o mumu ai le afi, e aulelei fafo ae auleaga totonu. A’o le mea e sili ona leaga i le taimi o Iesu, e tausolomua i ta’ita’i o le lotu Iutaia ituaiga uiga ia. O tagata ia na fai ma fa’alavelave i le galuega a Iesu.

O le tele lava la o a’oa’oga ma mea na faia e Iesu, na ia lu’iina ai le ituaiga olaga lea na ola ai tagata nei i lona vaitau. I le vaega lea o le mataupu sa faitauina, o lo’o aumai ai ni fa’ataoto a Iesu e fa’amatala ai le uiga o le ola fa’afoliga o le tagata. O le galuega la a Iesu, o le taumafai lea ina ia suia olaga o tagata aua o lana misiona lea i le lalolagi o le fa’aolaina lea o agaga o tagata. Ia suia mai i le leaga i le lelei, suia mai le pologa i le sa’oloto. Aua o le o’o mai o Iesu e tusa o le molimau a Luka, e le fa’apito na o se vaega o tagata, a’o le afio mai o Iesu ma aumai le fa’aolataga, e mo tagata uma. O le isi mea taua, na o’o lava i so’o na filifilia e Iesu, na maua foi i a’i latou uiga ia, na silafia lelei lava e Iesu mea uma na tutupu i lona au so’o. A’o le uiga moni ia o ana a’oa’oga, na mamafa lava i lona au so’o aua o i latou e fa’aauauina le galuega. O mea na tutupu i le taimi o Iesu, o mea lava foi ia o lo’o tupu i o tatou foi taimi, o uiga lava ia o le ola fa’afoliga o tagata. Ae ia tatou iloa, o le o’o mai o Iesu e tusa ai ma fa’amaumauga a le Tusi Paia, na suia uma ai mea uma o le foafoaga ma le tagata. E ui lava la o uiga ma amioga a le tagata, a ua faia e Iesu le fa’aolataga mo tagata uma.

#### **A’OA’OGA:**

1. E le lelei le ola fa’afoliga.
2. O le fa’aolataga a Iesu, e mo tagata uma ua talitonu ma fa’atuatua ia te Ia.
3. Aua e te fa’amasino atu i le isi tagata.

#### **GALUEGA FA’ATINO: Fesili ma Tali**

1. O ai tagata ia o lo’o ta’ua o tagata ola fa’afoliga i le tala?

**Tali:** O le au faresaio.

2. Se uiga lelei le fa’afoliga pe leai?

**Tali:** E leai.

3. O a uiga o le tagata ola fa'afoliga?

**Tali:** E galue i le vaa'iga o mata, e teuteu fafo ae leaga totonu.

4. O le a la se a'oa'oga ta'ua ua e maua mai i le mataupu?

**Pese: Ia ta'u uma Tama, Tina ma le Aiga pe a usu le pese**

Ta'u i lou Tama o Iesu e lelei o ia x2

Tuli! Tuli satani x2

Ta'u i lou Tama o Iesu e lelei o ia.

Ia saunia e le faiaoga le tatalo e fa'ai'u ai le mataupu.

### **IA MANUIA LE ASO SA!!**

\*\*\*\*\*

#### **ASO SA MATI 19, 2023**

**MATAUPU 7: "IA MANATU OE I SE MEA LELEI UA E FAIA"** (Remembering you of a good deed)

**TUSI FAITAU:** Mareko 14: 3-9

**SINI:** Ia mae'a le mataupu, ua malamalama le fanau po'o le a se mea lelei ua ia maua mai i le tala, e fa'atautu foi i se mea lelei na tupu i lona olaga.

#### **FESOASOANI MO FAIAOGA:**

E tatau lava ona amata le mataupu lenei i le tu'u o le avanoa i tamaiti e fa'amatala mai ai lava e le tamaitiiti ia, po'o le a se mea lelei na ia faia mo lona aiga po'o lona nu'u ma lana Ekalesia po'o se isi foi tagata. Ia manatua mo le taumafai lava ina ia sosolo pea ma feso'ota'i mataupu uma o le Masina, o le mea lea, ia toe fa'amanatu i ai le mataupu o le Aso Sa ua mavae na ta'ua ai le uiga masani o tagata. O le tala foi lea, o lou faia o se mea lelei mo le isi tagata, e tiga ai foi le loto o le tagata. Ia manuia le fa'amatalaina o le mataupu.

#### **SINA FA'ASOA MO LE MATAUPU:**

O le tatou mataupu o lenei aso, "**Ia manatu oe i se mea lelei ua e faia**" O le fesili, o le a se mea lelei na e faia o e manatua? (tu'u le avanoa i tamaiti) lelei tele outou. A'o le tala lea na tatou faitauina, o le fafine ma le fagu alapasa. Fai mai a'o i ai Iesu i le fale o Simona le lepela, na afea ai e le fafine lea ma lana fagu alapasa, o lea fagu o lo'o i ai le u'u manogi ma e fai si taugata tele o lea fagu i lea vaitau. O le galuega la a le fafine lenei, fai mai e le'i vaai lava le fafine i le taugata a ua ia tata'e le fagu ma ia fa'aoga loa le u'u manogi e liligi i le ao (ulu) o Iesu. O se gaioiga po'o se galuega lelei tele lea na faia e le fafine i le finagalo o le Alii. Peita'i, i le vaai fa'a-le-tagata a le au so'o, fai mai na matua tiga o latou loto ma latou fa'apea ifo ia Iesu, aisea ua ma'umau ai le fagu taugata pe ana fa'atau ua maua ai ni tupe e tufa ma e matitiva.

E ese lava le vaai a le tagata ese foi le silasila a Iesu. Fa'auta i le tali a Iesu, tu'u pea ia, o le mea lelei ua ia faia ia te a'u nei. O le uiga o le manatu o Iesu, ua ia fa'aali manino i lona au so'o tou te mafuta pea ma tagata i aso uma, e mafai ai ona outou fesoasoani atu i ai. A'o le mea ua faia e le fafine, e manatua ai pea o ia i le galuega fa'a-so'o. O le galuega lelei na faia e le fafine, o le fa'ata'imuaga lea o le maliu o Iesu. O le galuega e manatua pea pe a tatou mafaufau i le maliu ma le toetu o le Alii. O le uiga lea o le tali a Iesu na tali ai i lona au so'o ina ia o latou malamalama i ai, aua o latou e fa'aauuina le galuega.

A'o se a'oa'oga lelei foi mo tatou, ia o tatou ola ma mafaufau po'o le a se mea lelei ua e faia mo ou matua ma lou aiga. O lo'o tautiga o outou matua e saili tupe e totogi ai le aoga ma fa'atino mea tou te manana'o ai. Ae o le a sau mea lelei e te tali atu ai, ia outou maua le ola fa'alogo ma usita'i, ia fai lelei lau amio ma ia e toaga e fai au meaaoga ona e maua lea o le poto ma maua ai lau galuega e tausi ai lou aiga. Ia e mafaufau lava oe i sau mea lelei e fai moo u matua, o lou aiga, o lau Ekalesia ma lou nu'u po'o le atunu'u foi, ae sili ai o sau mea lelei e fai mo le Atua.

### **A'OA'OGA:**

1. Ia agalelei ma fesoasoani i so'o se tagata
2. Ia taumafai e fai se mea lelei mo ou matua.
3. Aua le vaai fa'atauva'a i le isi tagata o lo'o faia se galuega lelei.

### **GALUEGA FA'ATINO:**

1. Ia tu'u se taimi i tamaiti e toe fa'amatala mai ai le tala sa fa'amatala, ae fa'aoga mai se pepa e tusi mai ai ia le silia ma le tasi se parakalafa.

**Pese:** Ia usu se pese e fetau ma le mataupu, ma ia fa'ai'u le vasega i se tatalo e saunia e se tama.

### **IA MANUIA LE ASO SA!!**

\*\*\*\*\*

### **ASO SA MATI 26, 2023**

#### **MATAUPU 8: "SUEGA LONA LUA"**

**SINI:** E toe fa'amanatu ai tala sa fa'amatalaina o lenei foi Masina po'o manatua pea e le fanau i o latou mafaufau.

#### **FESSOASOANI MO FAIAOGA:**

E fa'aauau pea le faiga o tatou suega e pei ona masani ai i fa'ai'uga o Masina. E pule lava faiaoga pe fa'aoga pepa ia pe faigutu foi fesili, a'o le meat aua, ia fa'ataunu'u ma fa'amanatu mataupu aemaise le manatu ta'ita'i o le Masina.

#### **Fesili ma Tali:**

1. O le a le uiga o le manatu 'Ia tasi uma ia Keriso'?

**Tali:** Ia tasi i la le fa'atuatua.

2. Aisea ua mafua ai lea manatu i le Aposetolo o Paulo?

**Tali:** Ona ua le tasi tagata Kalatia.

3. E fa'apefea ona iloa ua tasi ia Keriso?

**Tali:** E iloa ina ua galulue fa'atasi ma loto gatasi tagata uma.

4. O le a le uiga o le ta'uamionuina?

**Tali:** O le amionu.

5. O se uiga lelei le ola fa'afoliga?

**Tali:** E leai.

6. O ai tagata fa'afoliga lea na feagai ma Iesu i lana galuega?

**Tali:** O le au faresaio.

7. O a foliga o le tagata ola fa'afoliga?

**Tali:** E galue i le vaa'iga o mata ae le o i ai le loto.

8. O le a le mea lelei na faia e le fafine ia Iesu?

**Tali:** Na ia liligi le u'u nato tautele i le ao o Iesu.

9. O le a le vaai a le au so'o i le gaoiga na faia e le fafine?

**Tali:** O le manatu o le au so'o, ua ma'umau le u'u taugata pe ana fa'atau ua maua ai se tupe tele.

10. O a ni a'oa'oga na outou maua i mataupu o lenei Masina?

Malo lava le onosa'i fa'afetai foi mo galuega o lenei Masina. Ia manuia tele fuafuaga o fegai ai ma outou. Ia saunia se pese ma tofi se teine e fa'auma le vasega i le tatalo.

### **MANUIA LE ASO SA!!**

\*\*\*\*\*

**ASO SA APERILA 02, 2023 (Aso Sa Laupama)**

**MATAUPU 9: "O TALA MA'AI I LE TINO"** (A thorn in the flesh)

**TUSI FAITAU:** 2Korinito 12: 7-10

**SINI:** Ia a'oa'oina le fanau ina ia malamalama feso'ota'iga o le mataupu ma le Aso Sa Laupama.

#### **FESOASOANI MO FAIAOGA:**

O le Aso Sa lenei ua masani ai tamaiti o le aso o le malaga fa'atupu a Iesu. Ae fa'amoemoe lava o le a lelei le fa'amatalaina o le tatou mataupu e tusa ai ma le agaga moni o lenei aso fa'amanatuina i tausaga uma. Ia manuia le tapenaga.

#### **FESOASOANI MO LE MATAUPU:**

O le Aso Sa lenei o le Aso Sa laupama po'o le aso e fa'amanatu ai le malaga fa'atupu a Iesu i Ierusalem. Ae fai mai le tatou mataupu "**O tala ma'ai i le tino**" A tatou mafaufau i ai, o lona uiga o tala ma'ai i le tino o Iesu. E amata atu lava i le laau o le laupama na folasia ai le ala, ma le pale tuitui na fa'apaleina ai Iesu ma le tao na tui ai lona itu. O mea ma'ai ia tatou te iloa i tala ia fa'asolo atu i le maliu o Iesu.

Ae peita'i, e ese foi le molimau a le aposetolo o Paulo i mea ma'ai e pei ona ta'ua i le tusi faitau ua aumai mo le tatou mataupu o lenei aso. E foliga mai o mea matuitui o lo'o ta'ua, o fa'aosoosoga a satani na o'o i le aposetolo, lea na ia aioi fa'atolu ai i le Alii. O le manatu o le aposetolo o lo'o fa'atusa mea ma'ai i le malolosi o puapuaga na o'o ia te ia, peita'i, o le alofa tunoa o le Atua na tino mai ia Iesu. O lea na ia manumalo mai ai i faigata e tele na feagai ma ia, o lea la ua fai ai ma mea suamalie ia te ia puapuaga o le olaga.

O Korinito, o se nofoaga e to'atele ai tagata o atunu'u ese'ese ona o latou fefa'ataua'iga oloa, o le ala foi lea o le tele o talitonuga ese'ese ma o tagata ia o lo'o feagai ma le aposetolo, lea na mafua ai lana tusi lea ia Korinito. O mea vaivai o le olaga e pei ona ta'ua i le fuaiupu e 10, o le fa'aleaga, o le agatele, o malaia ma le atuatuvaletu ona o Keriso. O mea ma'ai foi ia na feagai ma Iesu a'o aga'i atu i lona maliu, lea e molimau i ai Paulo. A'o mea foi ia e fegai pea ma tatou i aso

uma ma taimi uma o le olaga. Ae fai mai o le mana o Keriso, tatou te malolosi ai, pe a tatou talia ma ososa'ia puapuaga e o'o mai.

**A'OA'OGA:**

1. Ia tatou onosa'i i mea faigata e o'o mai i a'i tatou.
2. Aua le fa'avaivai pe fiu gofie, a ia tauivi pea.
3. Ia tatou mitamita i puapuaga ona o Keriso.

**GALUEGA FA'ATINO:**

1. O le a le uiga 'o tala ma'ai i le tino'?

**Tali:** O puapuaga ma faigata na tutupu ia Iesu e pei ona molimau ai le aposetolo o Paulo.

2. Aisea e mitamita ai Paulo i puapuaga?

**Tali:** Ona ua ia foi mai ai ma ua ia molimau ai i le alofa o le Atua.

3. E manaia foi ae fai sina fa'atinoga pu'upu'u o le tala.

**Pese:** A ia e tau malosi, tete'e i le fili  
Aua lava ne'i e fa'avaivai.  
A ia e tau ma le Alii o 'au  
E aoga e tutumau.

Ia tofia e le faiaoga se isi e faia le tatalo e fa'auma ai le vasega.

***IA MANUIA TELE LE ASO SA!!***

\*\*\*\*\*

**ASO SA APERILA 09, 2023 (Aso Sa o le Eseta)**

**MATAUPU 10: "E LE O LE MALOSI" (Not by power)**

**TUSI FAITAU:** Roma 6: 1-14

**SINI:** Ia a'oa'oina tamaiti, e ui i le malosi o faiga a le malo o Roma ma le agasala o tagata, ua tatala mea uma i le alofa tunoa o Keriso e ala i lona maliu.

**FESOASOANI MO FAIAOGA:**

O le Aso Sa lenei o le Eseta, talitonu o lo'o sologa lelei mea uma e ala i le fesoasoani mai o le Atua i o tatou tagata ta'ito'atasi. E le mafai lava e so tatou malosi po'o se tatou iloa ona fa'atino ma fa'ataunu'u o tatou tiute, pe ana le seanoa le alofa o le Atua ia'i tatou. O le mea foi lea e tauiologolo atu ai pea lenei ofisa ina ia 'aua ne'i o tatou fa'amoemoe i lo tatou iloa ma lo tatou malosi, a 'ia lava sou taimi e fai ai lau su'esuega i le Tusi Paia i le mataupu ua tu'uina atu. Ia manuia la outou galuega o lenei Aso Sa.

**FESOASOANI MO LE MATAUPU:**

E le faigofie le galuega o le tala lelei o lo'o feagai ma le Au Kerisiano i totonu o leEkalesia i Roma. O le galuega e o fa'atasi ai le malosi fa'aletino ma le malosi fa'aleagaga. O le mata'utia o le sauaina o Kerisiano o le isi lea ala, e tatau ona toa le loto o le Kerisiano ma ia malosi lona fa'atuatua. Ia toa le loto o le Kerisiano ina ia aua ne'i fefe i le oti. A 'ia malosi lona fa'atuatua i le

tala lelei ia Iesu, aua o le manuia lea e fa'avavau o le Kerisiano fa'amaoni. O le ola sauaina o se tiga e mavae, ae tumau le manuia o le tagata pe a salamo mai agasala ona o le maliu o Keriso.

O le uiga lea o le fa'amalosi atu o le Aposetolo i le Ekalesia. E ui i le pule malosi a Roma ma le matui'a o le agasala. O mea malolosi ia ua mafai ona gafatia uma ma fa'ato'ilaloina e le maliu o Iesu ma lona alofa tunoa. Fai mai le Aposetolo: *"Tatou te nonofo pea ea i le agasala ina ia fa'atele ai le alofa tunoa."* O le alofa tunoa o Keriso e leai se mea e gata ai, e le mafai e le agasala ona ausia pe taofia mai le tagata mai le alofa tunoa o Keriso. O le maliu o Keriso i manatu o Paulo, o le tatanu fa'atasi lava foi lea ma o tatou agasala. O le taulaga ua sausuina uma ai le tagata Kerisiano ma le tagata agasala. Peita'i o le naunau atu o le Aposetolo, ina ia salamo mai agasala ma talia le alofa tunoa o Keriso. E leai a se isi malosi e sili atu nai lo le satauro o Keriso. O le toetu mai foi o Keriso, o le ata lava foi lea o le fa'aolaina o le tagata mai le loloto o le agasala.

O le agasala lava ia o ala ia o le tiapolo, a ua uma ona tapena e Keriso le ala e soloia ese ai nei agasala uma. O le fa'amoemoe laualuga o le Aposetolo mo le Ekalesia i Roma. Ina ia salamo mai agasala, ua avea le satauro o Keriso ma lona alofa tunoa ma malosi sili e latou te tau ai le taua lelei o le tala lelei fa'aauau i totonu o sauaga ma puapuaga. E leai lava se isi malosi e tutusa ma le malosi o le satauro o Keriso.

O se a'oa'oga lelei foi lea mo tatou le fanau, o upu a le Aposetolo, e le pule le agasala ia te'i tatou. E ui i le malosi o le fili e tau fa'aosooso mai pea, peita'i, e le mafai e lea malosi ona manumalo mai ai i le alofa tunoa o Keriso e ala i lona maliu. E pei ona tatou iai i lenei Aso Sa ma lona fa'amoemoe, e tatou te fa'amanatuina ai le toetu manumalo mai o lo tatou Alii Fa'aola o Iesu Keriso. O lo tatou manumalo fa'atasi lava lea ma Ia e fa'avavau. O lona uiga, ua le toe pule le agasala ia'i tatou, a ua agava'a uma i tatou i le ola e fa'avavau, e ala i le salamo mai agasala ma fa'atuatua pea ia Iesu.

#### **A'OA'OGA:**

1. O le maliu o Iesu ua fai lea ma tatou fa'aolataga.
2. Ia salamo mai ia tatou agasala.
3. O le alofa tunoa o Keriso e mo tagata uma lava.

#### **GALUEGA FA'ATINO: Fa'afetaui upu i o latou uiga.**

1. Agasala - o le alofa le fa'atuaia o le Atua e ala ia Iesu.
2. Alofa tunoa - o manaoga leaga o le loto ma le mafaufau.
3. Toefuataina - o gaioiga sese e le tusa ma tulafono ma le finagalo o Iesu.
4. Papatisoina - suiga atoatoa ona lelei.
5. Tu'inanau - o le sausuina i le vai ina ia fa'amaufa'ailogaina mo le Atua.

#### **PESE: Olioli i le Alii o lo'u malosi lea x2**

#### **Olioli i le Alii o lo'u malosi lea x2**

**TATALO:** Iesu lo matou fa'aola, fa'afetai I lou alofa tunoa e ala I lou maliu, ua matou maua ai le malosi sili matou te mafaia ai mea faigata o le olaga. Fesoasoani mai pea ia te'i matou fa'apea o matou aiga, o nu'u le atunu'u ma le Ekalesia. Ia e fa'amagalalo mai foi I a matou agasala. Ona o Iesu la matou uo...AMENE.

## **ASO SA APERILA 16, 2023**

### **MATAUPU 12: “TUPU MA OLA I LE AGAGA” (Living by the Spirit)**

**TUSI FAITAU:** Kalatia 5: 16-26

**SINI:** Ia malamalama le fanau, e le na o le ta’uta’u o le Agaga ma folafola atu, a ‘ia tupu ma ola i le Agaga.

#### **FESOASOANI MO FAIAOGA:**

Ua fa’amalo le fai o le faiva i le a’oa’oina lea o fanau a le tatou Ekalesia, e le auaoa le lagi i le silasila a le Atua i le fa’atinoina o la outou pitolaau fa’a-faiaoga Aso Sa. O le taugologolo lava e maua ai manatu ae a la tatou galuega fai fa’atasi. Ia taula’i pea le fa’amatalaina o mataupu i le manatu ta’ita’i o le Masina. Fa’amanuia le Atua i le tapenaga o le mataupu.

#### **SINA FA’ASOA MO LE MATAUPU:**

O le tusi a le aposetolo o Paulo ia Kalatia, o le tusi o le sa’olotoga. O le manatu o Paulo e fa’atatau i le uiga o amioga i la le Agaga. O le uiga o le manatu o le aposetolo o lo’o fa’amanino atu ia Kalatia, e i ai lava le fete’ena’iga o le tino ma le Agaga, ae afai e ta’ita’ina outou e le Agaga, ua le toe nonofo la outou i le tulafono po’o le pologa foi. O le mataupu foi lea, o lo’o aumai ai e Paulo galuega a le tino o mea na e le fai ai le tagata ma tofi o le malo o le Atua.

O le tagata e tupu ma ola i le Agaga, e tataua la ona ia te ia fua o le Agaga e pei ona ta’ua i le mataupu lenei. “A’o le fua o le Agaga o le alofa, o le olioli, o le filemu, o le onosa’i, o le mataalofa, o le agalelei, o le fa’amaoni, o le agamalu ma le amio mama, e le fa’atulafonoina mea fa’apena.” O mea ia e mafai ai e le tagata ona tete’e atu i tu’inanau o le tino, aua o uiga ia o la le Agaga. O le taumafai lava o le aposetolo ina ia tumau tagata o Kalatia i le mea ua uma ona ia a’oa’oina ai i latou. Ona o le mea ua tupu ia Kalatia, ua toe liliu ese ma le tala lelei sa tala’iina e Paulo muamua, o le ala lea o le le fiafia o le aposetolo ma ia tusi ai lana tusi lea. O le tala’iga a Paulo, o le fa’ailoa atu lea i tagata o lona fa’atuatua na mafua ona o le Atua na valaauina o ia mo le galuega tala’i i nu’u ese. A’o le mafua’aga o lana tusi ia Kalatia ona ua le tasi tagata i le tala lelei. O le ata vaai lea o le le tumau o tagata Kalatia i ana a’oa’oga ma lana tala’iga, lea la ua faamalamalama atu i ai e Paulo le mafuaaga e ala ai ona feteena’i o latou manatu ma le tala lelei.

O le finagalo foi lea o le Atua mo i tatou, afai ua tatou ola i le Agaga, ia tatou savavali foi i le Agaga. O le ala lea na maliu ma toetu ai Keriso, ina ia fa’aolaina le tagata mai le pologa i le agasala. Tamaiti, ua tatou tutupu ma ola i le Agaga ona o Iesu, o le mea e ao ona tatou faia, ia tatou auuina ia te Ia ma le fa’amaoni. O le tagata e tupu ma ola i le Agaga, e fua mai ai mea lelei i lona olaga aua o lo’o fesoasoani i ai le Agaga. A’o le tagata na te le talia le Agaga, e na’o mea leaga lava foi e atagia i lona olaga.

#### **A’OA’OGA:**

1. Aua le ola tu’inanau e pologa ai.
2. Ua fa’asa’oloto mai tatou e Keriso ona o le alofa tunoa o le Atua.
3. Ia tupu ma ola i le Agaga e manuia ai.

#### **GALUEGA FA’ATINO: tusiga solo**

1. Ia tu’u sina taimi i tamaiti e tusi mai ai ni a latou solo, ae ave i ai e le faiaoga le autu e fa’atatau i ai le tusiga solo.



2. Ia le silia ma le lima fuaiupu o le solo, a uma ona fa'asolo lea i luga e faitau a latou solo.
3. Manaia foi ae piki se solo e tasi pe lua foi e faitau pe a potopoto fa'atasi le aoga Aso Sa.

**Pese: #114 (Pese ma Viiga)**

**TATALO:** Fa'afetai le Atua i lou Agaga o lo'o fa'amalosia pea lo matou ola ina ia matou savavali e tusa ma ou ala. Ua matou tatalo, ia a'oa'oina pea i matou le fanau, ina ia o matou iloa ona tupu ma ola i le Agaga e manuia ai o matou olaga. Fa'amagalalo lo matou ola le usiusita'i ma fa'alogo i matua ma e matutua. Amene.

***IA MANUIA LE ASO SA!!***

\*\*\*\*\*

**ASO SA APERILA 23, 2023**

**MATAUPU 13: "E TASI UMA IA KERISO"** (All one in Christ Jesus)

**TUSI FAITAU:** Kalatia 3: 23-29

**SINI:** Ia malamalama tamaiti i le uiga o le tasi ia Keriso e pei ona ta'ua e le Aposetolo o Paulo i lana tusi ia Kalatia.

**FESOASOANI MO FAIAOGA:**

Malo le saili fa'afetai le tapena mo mataupu a le fanau. Fa'afetai foi le onosa'i e tusa o tiute ma faiva o feagai pea ma outou. O le fa'amanatu masani lava mo le tapenaga i le fa'amatalaina o le mataupu. O le auga lava o aute o le tatou galuega, ia lava lou taimi e saili'ili ai ma su'esu'e i le tusi faitau aemaise ina ia fa'amasani iai e tusa o le mataupu. Ia manuia tele lau tapenaga.

**SINA FA'ASOA MO LE MATAUPU:**

E le fou le ola fevaevaea'i ma le fefulituaa'i o le lalolagi, e afua mai i le fa'asili pule ma le fe'ese'esea'i o manatu ma lagona o tagata, aemaise foi o talitonuga o tagata i a latou talitonuga. E le'i faigofie le galuega tala'i a le Aposetolo o Paulo ona o le tele o le mau tala'iga ese'ese sa iai i lona vaitau. E ui i ia fa'afitauli na tutupu, ae ua lava tapena le Aposetolo mo taimi fa'apenei, ua maa'a lona fa'atuatua e ala i le mafutaina e le Agaga Paia o le Atua.

O le tusi ia Kalatia, o le tusi o le sa'olotoga, i le manatu o le Aposetolo o lo'o fa'apea atu ia Kalatia, o le toetu o Keriso ua fa'asa'olotoina mai ai outou mai le amo o le pologa. I le fuaiupu e 27 ma le 28, "Aua o outou uma lava na papatisoina ia Keriso, ua outou o'ofu ia Keriso; e le o iai se Iutaia po o se Eleni, e le o iai se pologa po o se sa'oloto, e le o iai se tane po o se fafine; aua ua tasi lava outou uma ia Keriso Iesu."

O le mataupu lea o lo'o fa'aalia ai le le fiafia o Paulo ia Kalatia, ona ua uma ona a'oa'oina i latou i le tala lelei e ala i le Keriso toetu, a'o lea lava e fa'alua fesasi o latou mafaufau ma se'etia gofie lo latou fa'atuatua. O le uiga la o le manatu o le Aposetolo i le vaega o lana tusi lea na tatou faitauina, e le tataua ona latou toe foi i le amo o le pologa. Aua sa fai ma o latou ta'ita'itama le tulafono, peita'i o le maliu ma le toetu o Keriso i le manatu o Paulo, ua suia ai mea uma e ala i le alofa tunoa o le Atua, ua tino mai ia Iesu, ma ua ta'uamionuina ai le tagata ona o le amiotonu a Iesu Keriso.

Ioe le fanau, o le maliu ma le toetu o lo tatou Alii o Iesu Keriso, ua tasi uma ai i tatou e ala i le fa'atuatua fa'amaoni. O lona uiga, po'o a lava o tatou fe'ese'esea'iga i o tatou tralitonuga fa'a-le-

tagata, ia tatou iloa ma mautinoa, e tasi uma lava tatou ia Keriso. O lona finagalo, ia tatou maua le loto maulalo ma le loto fa'amagalo, ia nonofo fealofani ma fetausia'i, ae fusia mea uma i le alofa, aua o le finagalo lena o le Atua mo tatou uma.

**A'OA'OGA:**

1. Ia tatou maua le loto gatasi ma le fealofani.
2. O le loto maulalo ma ola fa'amagalo, o le finagalo moni lea o le Atua ia tatou faia.
3. Aua le fa'ailoga tagata.

**GALUEGA FA'ATINO: Upu ma o latou uiga**

fa'atuatua - fa'alagolago ma fa'amoemoe i mea e le vaaia e mata  
fa'aluaafesasi - le mautonu po'o le masalosalo  
ta'uamiotonu - amiotonu

**PESE:** Ia tasi, i tatou uma, le Tama  
O lona alofa, ua tatou maua, mai i le lalolagi.

**TATALO:** Fa'afetai tele lo matou Atua ona o Iesu Keriso lou Alo ua matou maua ai le loto e tasi matou te galulue fa'atasi ai e tautua lau Afio. Mafuta mai pea lou Agaga i a'i matou, ina ia maua ai pea lo matou tasi ia Keriso Iesu...AMENE.

**IA MANUIA LE ASO SA!!**

\*\*\*\*\*

**ASO SA APERILA 30, 2023**

**MATAUPU 14: "SUEGA LONA TOLU"**

**SINI:** Ia fa'amanatu ai pea i tamaiti tala o le Tusi Paia, ina ia mafai ona taofi i o latou mafaufau ma manatua pea i taimi uma.

**FESOASOANI MO FAIAOGA:**

E mana'omia lava ona fai ni kopi mo le fanau mo le tatou suega i fesili ua tu'uina atu, ae pule lava faiaoga pe toe fa'aopoopo nisi fesili. Ae manaia foi ae saunia ni nai fa'ailoga mo le tamaitiiti e sili ana togi. Fai atu ai foi.

**SUEGA: Tali i le Sa'o & Sese ma tali fesili o lo'o i lalo.**

1. Ia tatou mitamita i puapuaga ona o Keriso. = **Tali:** Sa'o
2. O tala maa'i i le tino o lo'o fa'atusa i puapuaga na o'o ia Iesu.. = **Tali:** Sa'o
3. Ia tatou fa'alagolago i lo tatou malosi e manuia ai. = **Tali:** Sese
4. Ua fa'asa'oloto mai tatou e Keriso ona o le alofa tunoa o le Atua.. = **Tali:** Sa'o
5. E lelei le ola tu'inanau. = **Tali:** Sese
6. O le a le uiga o tala ma'ai i le tino e pei ona ta'ua e Paulo?  
**Tali:** O lo'o fa'atatau i faigata ma puapuaga na o'o ia Iesu, e fa'apea foi puapuaga o lo'o feagai ma ia i lana galuega tala'i.

7. Aisea e mitamita ai Paulo i puapuaga?

**Tali:** Aua ua ia o’o i ai ma ia molimau ai i le alofa o le Atua, ma o le tagata ua maua’ a lona fa’atuatua.

8. O a fua o le Agaga?

**Tali:** O le olioli, o le filemu, o le onosa’i, o le mataalofa, o le agalelei, o le fa’amaoni, o le agamalu, o le amio mama.

9. A’o a la amio a le tino e pei ona ta’ua i le mataupu?

**Tali:** O le amio leaga, o le faita’aga, o le ifo i tupua, o le feitaga’i, o le finau vale, o maseiga, o le losilosu vale, o le fevaevaea’i, o le matau’a, ma poula.

10. Tusi mai ma fa’amatala mai se mea taua sa e maua mai i mataupu o lenei Masina.

Malo lava le galulue fa’afetai tapena mo mataupu o lenei foi Masina. Ia fa’a-tamaoiga pea outou e le Atua i ana meaalofa aua lana galuega. Ia saili se pese ma tofi se tama e fai le tatalo.

### ***IA MANUIA TELE LE ASA SA!!***

\*\*\*\*\*

**ASO SA ME 07, 2023**

**MATAUPU 15: “SAU MA AVE E TUSA MA LANA E MANA’OMIA”** (Come and take as you need)

**TUSI FAITAU:** Esoto 16: 1-18

**SINI:** Ia mae’a le mataupu ua malamalama le fanau i le tala o le fafagaina e le Atua o Isaraelu i le vao, ma o lo’o i ai le uiga o le tatou mataupu.

**FESOASOANI MO FAIAOGA:** Ia i le Atua pea le viiga nei e o’o i le fa’avavau. Fa’afetai ua sopo mai lo outou soifua i le amataga o lenei foi Masina, talitonu le manatu o lo’o maua pea lo outou malosia fa’afouina mai le Atua i lenei aso. Malo le pale fa’afetai le onosa’i i le fa’atinoina o a outou matafaioi tauave e le gata o tiute fa’a-le-malo, o totonu foi o aiga, ae fa’apea foi le Ekalesia. O le tusi faitau lava le fa’amanatu masani ina ia faitau pea ma su’esu’e atili i ai mo le malamalama o le mataupu. Ia manuia le galuega o lenei Aso Sa.

**SINA FA’ASOA MO LE MATAUPU:**

O le tatou mataupu o lenei Aso Sa, “**Sau ma ave e tusa ma lana e mana’omia.**” O lona uiga o lea manatu, ia ave na’o mea e mana’omia mo le aso. O le masani lava a o tatou tagata, a o’o ina maua ni fa’amanuiaga e pei o tupe, o meaai, ma isi, e fiafia lava e talisapaia. Peita’i, e vaai atu loa ua tele, ona mana’o loa lea e toe fa’aopoopo mai sina isi vaega ma ia, o le mea tonu lava lena e ta’u o le fa’aloloto e mafaufau lava na’o ia ae le vaai i isi tagata. E le fa’amalieina le loto i se mea ua maua i lea aso, ae mana’o foi ma mafaufau i mea mo le isi aso.

O le tusi o Esoto, o tala o le o ese mai o Isaraelu mai Aikupito i le mea sa nofo pologa ai i lalo o le ta’ita’iga a le tupu o Farao. I le mataupu lea sa faitauina, o le fafagaina e le Atua o Isaraelu i le taimi a’o i ai i latou i le vao. Fai mai ina ua fia a’ai le nu’u, o i’ina na lagona ai e Mose ma Arona lo latou muimui ma fa’apea ifo, ana matou oti lava i Aikupito, a’o matou nonofo latalata i ulo e tunu ai tufaga. Na lagona e le Atua le muimui o Isaraelu, o lea na ia fetalai ai ia Mose i le mea e ao ona ia ta’u atu i le nu’u. I le fuaiupu e 4, “Ona fetalai mai lea o le Alii ia Mose, Fa’auta, ou te

fa'atotoina ifo le mea e 'ai mai le lagi ma outou, e o atu foi le nu'u ma latou fa'aputuina, o le aso ma ana mea e tusa ai, ina ia ou tofotofa ai ia te i latou."

Ina ua fafagaina le nu'u, na alu atu fa'atasi ai lava ma le poloaiga, ia fa'aputu i ai e ta'itasi le tagata e tusa ma lana e 'ai ai, o le omera foi ma le tagata. O lona uiga, e fua lava le meaai e tatau mo le taimi ma le aso ua fa'atulaga. O le fa'atonuga lea a le Atua na ia tofotofa ai lona nu'u pe fa'amata e usita'i. Peita'i, i le fa'ai'uga o le mataupu, e le'i usita'i Isaraelu ia Mose, na o latou fa'atotoe lava meaai mo le isi aso, ma o le mea ua tupu fai mai ua manogi ma ua le tatau ona toe fa'aogaina. Tamaiti, o le mea taua ia tatou iloa, o le finagalo tupito o le Atua mo lona nu'u, ia ola fa'alogoma usita'i, ma ia savavali e tusa ma ala o le Atua. E fa'apea foi tatou, e tatau foi ona tatou fa'alogoma usita'i i matua aua o sui vaaia ia o le Atua i totonu o aiga, ma ia fa'amalieina tatou i mea ua maua i lea aso ma lea aso, aua o le aso lava ma mea e foa'i mai e le Atua mo i tatou.

### **A'oa'oga:**

1. E taua le fa'alogoma usita'i i le Atua.
2. Ia tatou iloa, e foa'i mai e le Atua mea e tatau mo lea aso ma lea aso.
3. Aua tatou te naunau tele ae ia tatou iloa fa'afetai i le Atua e tusa ma lona alofa mai.

**Galuega Fa'atino:** Fa'atumu avanoa i upu nei, o fuaiupu o lo'o i le tusi faitau; *eleele, togalauapi, sau, ufitia, fogaelele, sauto'a, salu, fa'apotopotoga.*

Ua o'o i le afiafi ona a'e mai lea o \_\_\_\_, ua \_\_\_\_\_ ai le \_\_\_\_\_, o le taeao foi ua toto ai le \_\_\_\_, ua sioina ai le togalauapi. Ua alu ae foi le sau sa toto, fa'auta, o le \_\_\_\_\_, ua i ai ni mea iti \_\_\_\_\_, e laiti pei o le \_\_\_\_\_ i luga o le \_\_\_\_\_.

**Pese:** Lo'u Atua e, ua ou fia 'ai ia e fafaga ia te a'u x2

Lo'u Atua e, ua ou fia 'ai ia e fafaga ia te a'u  
Fafaga ia te a'u i aso uma o lo'u olaga.  
Fafaga ia te a'u i le manai mai luga  
Fafaga ia te a'u i au Afioga  
Fafaga ia te a'u i aso uma o lo'u ola.

**Tatalo:** Fa'afetai tele le Atua i le tele o le tamaoaiga ua e foa'i mai e tausi ai lo matou ola, ua a'oa'oina foi matou i leni taeao ina ia gata lo matou mana'o i mea ua maua i lea aso ma lea aso. Ia fa'amagaloma i matou i lo matou le fa'alogoma usita'i i matua. Ona o lou suafa Iesu..Amene.

### ***IA MANUIA LE ASO SA!!***

\*\*\*\*\*

**ASO SA ME 14, 2023 (Aso Sa o Tina)**

**MATAUPU 16: "UA AVEESE LE TOFI MASIOFO O VASATI"** (Queen Vashti deposed)

**TUSI FAITAU:** Eseta 1: 1-20

**SINI:** Ia uma le fa'amatalaina o le mataupu, ua malamalama le fanau i le mafuaaga ua aveese ai le tofi masiofo o Vasati.

**FESOASOANI MO LE FAIAOGA:** Talu ai ona o le Aso Sa leni o Tina, e ao ai lava ona momoli atu alofaaga ma fa'amanuia atu le Aso Sa o Tina i le Tina o le galuega fa'apea Tina uma

o le aulotu. Malo lava le galulue i tiute ua valaauina i ai lo outou soifua e le Atua, ma ia outou maua se Aso Sa o Tina fiafia. Ia manuia le fa'amanatuina o le Aso Sa o Tina i lenei tausaga.

### **FESOASOANI MO LE MATAUPU:**

O Vasati o le masiofo a le tupu o Asueru a'o avea ma tupu i lea foi vaitau. Sa i ai se tasi o aso ua manatu ai le tupu o le a fai se fiafia tele, ae se'i va'ava'ai Alii sili o le malo ma tagata uma a'o siva lana masiofo. Na ia poloaiga loa ana auauna ina ia logo uma alii sili o Peresia ma Metai ina ia auai uma mai i lea tausamiga tele o le a fai. Fai mai le tala a'o fai le tausamiga ma ua fiafia le tupu, ona ia fa'atonuina lea o ana eunuka ina ia a'ami ia Vasati e sau se'i silasila alii sili ma tagata o le nu'u i le lalelei o lana masiofo. O le mea ua tupu, na iloa lelei e Vasati le mea o le a faia e le tupu ia te ia, o le mea la lea na te'ena ai e Vasati le avea'i no o'atu ia te ia.

O le tala fai mai na ita tele le tupu, ona ia fesili lea i e popoto po'o alii sili e to'a fitu o Peresia ma Metai, po'o le a se mea o le a faia i le masiofo e tusa ma le tulafono on aua le usita'i i le fa'atonuga a le tupu o Asueru. Sa tali ane i ai se tasi o alii e igoa ia Memukana ma fa'apea, e le na'o le tupu ua faia i ai e Vasati uiga ia, ae ua ia faia i alii sili uma ma le tupu. O lea na faia ai se tusi ma saina uma ai alii sili uma o le nu'u, ina ia taofi ai ona toe o'o Vasati i le maota o le tupu, ae ia saili se isi masiofo a le tupu o Asueru.

O le le faia e Vasati o le mea na mana'o ai le tupu, o se fa'ai'uga o lo'o aumai ai se feau taua mo tatou i le isi itu. E le'i popole lava Vasati i lona tofi masiofo po'o tulafono foi a Peresia ma Metai, a'o le mea sili e tatau ona fai. Ia puipui lona tamali'i'aga po'o lona mamalu fa'a-Tina. Aua o le finagalo o le tupu, se'i alu atu lana masiofo e siva i luma o alii sili ma tagata uma o le nu'u, e le avea lona tulaga fa'a-tupu ma mea e fai ai le mea sese. O se mea lelei foi lea mo so'o se Tina, ia mafaufau lelei i lana fa'ai'uga e tatau ona fai, e moni lava o Tama o le ulu o le aiga, ae tatau lava ona lelei le fautua ma le tu'ualalo a le Tina. O se a'oa'oga foi lea mo le fanau, ia tatou mafaufau lelei ia tatou fa'ai'uga fai, aua tatou te vavevave a 'ia tatou fa'autauta lelei ina ia sa'o le mea e ao ona fai. O le finagalo foi lea o le Atua mo tatou, ia fai le mea amiotonu.

### **A'oa'oga:**

1. Ia mafaufau lelei i au fa'ai'uga fai.
2. E le o le tofi a'o lou tagata ina ia puipuia mai i mea e leaga ai.
3. Ia toto'o le vaai i mea e fa'aosoosoina ai oe.

### **Galuega Fa'atino: fesili ma tali**

1. E to'afia eunuka a le tupu?

**Tali:** E to'afitu.

2. O ai igoa o eunuka?

**Tali:** O Meumanu, o Piseta, o Harepona, o Pigeta, o Avageta, o Setara ma Karekase.

3. Ta'u mai igoa o alii sili o le malo o Peresia ma Metai.

**Tali:** O Karesena, o Setaru, o Atematu, o Tasesa, o Merese, o Maresena ma Memukana.

4. O se fa'ai'uga lelei lea sa fai e Vasati?

**Tali:** Ioe, o se fa'ai'uga sa'o lea sa fai e Vasati.

Fa'afetai atu mo le galuega o lenei Aso Sa, ia usu se pese e fetau ma le Aso Sa o Tina ma tofi se teine e fai le tatalo e fa'ai'u ai le vasega.

**ASO SA ME 21, 2023**

**MATAUPU 17: “MANUMALO MAI TUMUTUMU MAUGA”** (Victory from the mountain top)

**TUSI FAITAU:** Esoto 17: 8-16

**SINI:** Ia malamalama tamaiti i le uiga o le manumalo mai tumutumu mauga.

**FESOASOANI MO FAIAOGA:**

O tala o le Esoto, ou te talitonu o tala ua masani ai le fa’alogo, o le mea lea e ao ai lava ona fou lona fa’amatalaina ina ia maua ai pea le mautinoa o le fanau i le mataupu. O le mautinoa o le fanau, e maua mai i le mautinoa muamua o faiaoga e ala i le lava o le taimi e su’esu’e ai i le tusi faitau ua tu’uina atu. O le fa’amanatu masani lava ina ia maua pea e tamaiti ni a’oa’oga taua mai tala o lo’o fa’amatalaina. Ia manuia le tapenaga.

**SINA FA’ASOA MO LE MATAUPU:**

O le tatou mataupu o lenei aso, ‘**Manumalo mai tumutumu mauga**’ ae manatua le tatou manatu ta’ita’i o lenei Masina, ‘Malaga i le mauga paia’. O le talitonuga lava ia a Isaraelu e taua la latou vaai i le mauga, aua fai mai o le mea e afio tumau ai lo latou Atua. O le tatou mataupu, o le tala i le taua a Isaraelu ma Amaleka. Fai mai na fa’atonuina e Mose Iosua ina ia filifili ni tagata o le nu’u latou te sauni e tau le taua ma Amaleka. A’o ia o le a alu e tu i le tumutumu o le mauga ma le to’oto’o o le Atua i lona lima. Ona faia lea e Iosua e pei ona fa’atonuina ai o ia e Mose, ae ua o a’e Mose, Arona ma Huro i le tumutumu mauga. O le tu’utu’uga na fai afai ae si’i pea i luga le lima o Mose o lona uiga e manumalo Isaraelu, ae afai e tu’u i lalo lima o Mose ona manumalo lea o Amaleka.

O le galuega a Arona ma Huro sa fai, o le taumafai lea e taofi lima o Mose ina ia tumau pea ona si’i i luga aua ne’i pau i lalo. E le faigofie foi le galuega na feagai ma Arona ma Huro, aua a fua i le taimi na fai ai le taua o le aso atoa, e le taumate na lagona le vaivai, ae sa maua lava le onosa’i ona sa fa’alagolago i le Atua le la galuega sa fai. O le aga’i o Mose, Arona ma Huro i luga o le mauga, o le ata ua tu’u atu lo latou fa’amoemoe i le Atua e fesoasoani mai ina ia a’e manuia le taua o feagai ma Iosua ma le nu’u. O le fa’alagolago i le Atua e fesoasoani mai, e o fa’atasi ma le galulue fa’atasi e fa’atino le galuega ma le loto onosa’i. O le onosa’i ma le galulue fa’atasi o Mose, Arona ma Huro ma lo latou talitonu i le fesoasoani mai a lo latou Atua. O lea na maua ai le manumalo o Isaraelu i le taua ma Amaleka.

Ioe tamaiti, o se a’oa’oga taua ua tatou maua mai i le tala. Ia tatou ola fa’alagolago i le Atua e manuia ai o tatou fa’amoemoega uma. Fai mai upu a le fai-Salamo, ‘E fa’asaga a’e o’u mata i mauga, e o’o mai ai lo’u fesoasoani. O lo’u fesoasoani e mai le Alii lea, o le na faia le lagi ma le lalolagi.’ O lona uiga, o le Atua lava e maua ai lo tatou manumalo, pe afai e moni ma fa’amaoni lo tatou ola saili atu ia te Ia. O le taimi lava e galo ai i a’i tatou le Atua, ae fai o tatou loto, o le taimi foi lea e fegai ai tatou ma fa’afitauli o le olaga ona ua tatou faia’ina (fail) i fa’aoosoga a le tiapolo. Ia tepa taula’i pea la tatou vaai i le Atua, e maua ai lo tatou manumalo.

**A’oa’oga:**

1. O le fa’alagolago i le Atua e maua ai lo tatou manumalo.
2. Ia tatou maua le galulue fa’atasi e manuia ai a tatou fa’amoemoega uma.
3. A ‘au le Atua ma i tatou, e manuia o tatou olaga.

**Galuega Fa’atino: Fa’auma fuaiupu ia o lo’o i totonu o le tusi faitau**

1. Ona o mai lea o Amaleka \_\_\_\_\_.

2. Ona fa'atu ai lea e Mose le fata faitaulaga, \_\_\_\_\_.
3. \_\_\_\_\_ ma ona tagata e Iosua i le pelu.

**Pese:** Ia usu le pese lea e iai le tali lea;  
Fa'alagolago x2  
Fa'alagolago i a'ao o Iesu.

**TATALO:** Fa'afetali tele le Atua i lou fesoasoani mai i a'i matou le fanau, ua matou maua ai le malosi ma le ola fou i lenei aso. Fesoasoani mai pea le Alii e, ina ia matou ola fa'alagolago atu i lau Afio e manuia ai o matou olaga. Fa'amagalo i matou le fanau agasala. Ona o lou suafa Iesu. Amene.

### **IA MANUIA LE ASO SA!**

---

**ASO SA ME 28, 2023 (Aso Sa Penetekoso)**

**MATAUPU 18: "TASI I LE AGAGA MA FA'ATALITALI"** (One in spirit and waiting)

**TUSI FAITAU:** Galuega 2:1-21

**SINI:** Ia malamalama tamaiti i le taua o le fa'atalitali i fa'amanuiaga a le Agaga Paia e ta'ita'iina ai lo latou ola.

#### **FESOASOANI MO FAIAOGA:**

O le tatou fa'atalitali ma fa'alagolago i le ta'ita'iga a le Agaga Paia, e maua ai pea lo tatou malosi, ma fa'aosofia ai pea lo tatou naunau e fa'atino o tatou tiute e ala i tofiga ua valaauina iai lo outou soifua ma lo tatou ola. O lona uiga, ia tatou fa'amaoni pea i a tatou su'esu'ega i le Tusi Paia ma mataupu ta'itasi, e faigofie ai le fa'amatalaina o le mataupu i le Aso Sa.

#### **SINA FESOASOANI MO LE MATAUPU:**

O le tatou mataupu o lenei taeao, o le "Fa'atalitali". Ua tatou iloa ma malamalama i le uiga o le upu fa'atalitali. O le upu fa'atalitali e sau mai le upu o le fa'atali. O le tala lenei i le aso Penetekoso, po'o le aso o le afio ifo o le Agaga Paia. E pei ona ta'ua i le Galuega 1:8, le folafolaga a Iesu i ona so'o, e maua e i latou le mana, pe a afio ifo le Agaga Paia i luga ia te i latou, e fai ai i latou ma molimau ia Iesu Keriso, pe a tu'ua e Iesu la latou mafutaga.

Lea la ua amata lava le mataupu lenei e 2 o le tusi o Galuega i le fa'apea mai o le tusitala. "Ua o'o foi i le aso Penetekoso, sa iai uma i latou i le mea e tasi ma le loto gatasi." O lona uiga, o lea ua potopoto fa'atasi le au so'o ma isi tagata i le mea e tasi ma le loto gatasi, e fa'atalitali le meaalofa lea na folafola atu e Iesu ia te'i latou.

O le a le meaalofa? O le Agaga Paia o le Atua. E ui lava ina ua ta'ua e Iesu le latou mafutaga ma ona so'o, ae ua talia lava e le au so'o i o latou loto le fetalaiga a Iesu, e fa'atali mo le afio ifo o le Agaga Paia. Ia lea la e pei ona va'aia le mea na tupu i lea aso, o le matagi ua agi tele mai ma ua tumu ai le fale uma sa iai i latou.

O le upu matagi tamaiti i lona fa'aliliuina mai i le gagana Eperu, e tutusa ma le upu Agaga. O lona uiga o le matagi lea na agi malosi mai ma fa'atumuina ai le fale sa iai le au so'o, o le Agaga Paia lava lena o le Atua, e pei ona folafolaina mai e Iesu.

Ua iloa foi e i latou sa iai i lea taimi ma latou molimau i le mea na tupu, o laulaufaiva ua peisea'i o le afi, ua vaevaeina i luga o le au so'o, ma ua latou fa'alogo atu foi, ua tautatala mai le au so'o i gagana ese'ese, e ui o i latou uma o Iutaia. O lona uiga o le matagi, o le Agaga Paia lea o le Atua, ae o laulaufaiva afi, o gagana ia a le lalolagi ua tu'uina atu i le au so'o, latou te tala'i ai le tala lelei ia Iesu Keriso. O le vavega ua tupu, ina ua fa'atalitali ma le onosa'i le au so'o i le Agaga Paia o le Atua. Tamaiti, e ese le taua o le ola fa'atalitali i le Atua. O le tele o taimi tatou te faia ai fa'ai'uga sese, ma tatou pau'u atu ai i le agasala, ona ua tatou le lavatia ona onosa'i. Manatua e outou le fanau, o le Agaga Paia o le Atua, e le sau fa'anatinati, ae malosi ma mata'utia lona pa'i mai i le loto o le tagata pe a o'o ina sau.

Ae a afio mai foi le Agaga Paia o le Atua e fa'atumu i tatou, tatou te lagonaina lava lo tatou mafanafana, ma e tutupu foi vavega i o tatou olaga. O le upu moni lava lea. E mafua ona le tutupu ni vavega i o tatou olaga, ona ua tatou fa'amoemoe i lo tatou lava malosi ma le poto, ae ua tatou le tapa se fesoasoani mai o le Agaga Paia o le Atua, ma tatou fa'atalitali iai ma le onosa'i. Na mafaia lava e le tatou uo o Iesu ona fa'atino mea uma lava na afio mai e fa'atino, e o'o lava i lona maliu. Na mafaia e Iesu ia mea, aua sa fa'amoemoe tasi ma fa'atalitali pea i le fa'atonu mai o le Agaga Paia o le Atua. O le Agaga Paia lea na ia maua ai le malosi, e fa'ataunu'u ai le fa'aolataga mo le lalolagi agasala.

#### **A'OA'OGA:**

1. Tatalo mo le fesoasoani a le Agaga Paia e sa'o ai au fa'aiuga.
2. E tutupu vavega i o tatou olaga pe a fa'atalitali i le Agaga Paia o le Atua.
3. E faia e le Atua mea sili mo i tatou pe a tatou onosa'i.

#### **GALUEGA FA'ATINO: Taliga fesili**

1. O le a le uiga o le Penetekoso?

**Tali:** O le afio ifo o le Agaga Paia o le Atua.

2. O le a le uiga o le upu matagi pe a fa'aliliuina mai le gagana Eperu?

**Tali:** O le Agaga.

3. Aisea e tatau ai ona tatou fa'atalitali i le Agaga Paia o le Atua?

**Tali:** Aua e maua ai lo tatou malosi.

4. E fa'apefea ona tutupu vavega i o tatou olaga?

**Tali:** E tutupu vavega pe tatou onosa'i ma fa'atalitali i le Agaga Paia o le Atua.

**PESE:** O e fa'atali mo le Alii

E fa'afouina i latou

Fa'aloaloa apaau pei o Aeto

E taufetuli e le vaivai

Savavali saogalemu

Lavea'i lavea'i mai le Alii.

Fa'afetai tele mo le galuega o lenei Aso Sa, ia tofia se tama e fai se tatalo e fa'auma ai le vasega, ia manuia le alo atu i sauniga ma fuafuaga o le vaiaso.



## **MATAUPU 19: “FAI FUAFUA I LE MALOSI” (Don’t wear yourself out)**

**TUSI FAITAU:** Esoto 18: 13-27

**SINI:** Ia a’oa’o le fanau ina ia malamalama i le feso’otaiga o le mataupu ma le tala o lo’o aumai e le tusi faitau.

### **FESOASOANI MO FAIAOGA:**

O le tatou ato lava e feva’ilia’i ina ia maua pea manatu aua fanau ma lo latou ola a’oa’o ina i tala o le Tusi Paia. O lenei lava foi galuega e leai lava so tatou malosi ma se atoatoa o i a’i tatou, ae fa’amoemoe lava i le Atua e fesoasoani mai i lo tatou vaivai. O le mea foi lea e le mapu ai lava le fa’amanatu atu pea, ina ia o gatasi lo tatou fa’amoemoe i le Atua ma lo tatou fa’amaoni e mafuta ma su’esu’e i le tusi faitau o le mataupu ua tu’uina atu. Ia manuia faiva o lenei Aso Sa.

### **FESOASOANI MO LE MATAUPU:**

O le tusi o Esoto ina ia toe fa’amanatu pea i tamaiti, o le o ‘ese mai lea o Isaraelu mai Aikupito i le mea sa nofo pologa ai i le pule sau a Farao. So’o se fa’alapotopotoga e pei o le nu’u, o le faigamalo, o aiga ma Ekalesia, e i ai lava o latou ta’ita’i, e o’o lava foi i totonu o galuega ma aoga. O le tiute o le ta’ita’i, o ia na te ta’ita’ia ma saili auala e ao ona fa’atino ai lana ta’ita’iga, a lelei le ta’ita’i e manuia foi tagata o lo’o i lalo o lana ta’ita’iga, ae a fa’aletonu le ta’ita’i ua ta’apeape foi tagata o lo’o i lalo o lana ta’ita’iga. E le lelei foi le ta’ita’iga a se tagata ta’ita’i, pe afai e le galulue fa’atasi ma tagata, ae fa’amoemoe lava ia i lona malosi ma lona atamai.

O lo’o tatou talanoa i le ta’ita’iga a Mose o le nu’u o le Atua, e le fesiligia lana ta’ita’iga aua e fesili lava i le Atua i mea uma e ao ona ia faia e tali atu ai ia Isaraelu. Ae i le mataupu lea o lo’o tatou talanoa i ai, o lea ua amata ona fa’amasino atu Mose i le nu’u i le mea ua ia mana’o i ai ina ia faia e le nu’u. A’o le taimi tonu lea na taunu’u ai le Tama o le to’alua o Mose (Ietero) ma Sepora le to’alua o Mose, atoa ai ma ana tama tane o Keresoma ma Elisara. O le feiloaiga a Mose ma lona aiga ina ua o’o atu ia te ia i le vao, o lea na vaia ai e le Tama o lona to’alua le mea ua faia e Mose i le nu’u. O lea na fautuaina ai loa e Ietero Mose e le lelei le mea ua ia faia, ma na te le gafatia foi ona tauave to’atasi le faiga o lana galuega. E tataua ona tofia ni tagata latou te galulue fa’atasi mo le manuia o Isaraelu.

Na talia lelei e Mose le fautuaga a le Tama o lona to’alua, ma ua ia filifili ai loa tagata loto tetele ma tu’uina atu ai loa le pule latou te fa’amasino fa’atasi ai le nu’u. E leai se malosi o le tagata e mafai ai ona ia tauave to’atasi se tofiga ua ia te ia. E mana’omia lava e so’o se tagata fautuaga mai le isi tagata aua e leai lava se tasi e ato’atoa lona sa’o po’o lona lelei, e leai foi so tatou malosi po’o so tatou poto e fa’atino ai a tatou galuega uma. Tatou te tatalo i le Atua e fesoasoani mai i lo tatou vaivai, ae ao foi ona tatou talia fautuaga mai o tatou matua ma isi tagata tatou te mafuta atu i ai. E fuafua foi mea uma tatou te faia i lo tatou malosi e aumai e le Atua e fa’atino ai o tatou tiute ma faiva i lea aso ma lea aso.

### **A’oa’oga:**

1. Ia fa’atino o tatou tiute i le malosi ua aumai e le Atua, ae le o le fai i lo tatou iloa.
2. Ia tausoa fa’atasi le avega.
3. Talia fautuaga a matua ma isi tagata o lo’o mafuta fa’atasi ma oe.

### **Galuega Fa’atino: Taliga fesili**

1. O ai le igoa o le Tama o le to'alua o Mose?

**Tali:** O Ietero

2. A'o ai le igoa o le to'alua o Mose?

**Tali:** O Sepora

3. O ai igoa o le fanau e to'alua?

**Tali:** O Keresoma ma Elisara

4. O le a le uiga o le igoa o Keresoma?

**Tali:** Ua ou aumau i le nu'u ese.

5. A'o le a le uiga o le igoa o Elisara?

**Tali:** O le Atua o lo'u Tama, o lo'u fesoasoani lea, na ia laveai mai ia te a'u ai le pelu a Farao.

**PESE:** Olioli i le Alii o lo'u malosi lea (x 4)

**TATALO:** O lau lava Afio le Atua ua matou maua ai le malosi fou, fa'afetai i lou agalelei ma lou alofa tele mai. Ua matou tatalo ia e foa'i mai pea le malosi ma le poto aua lo matou fegai ai ma a'oa'oga, ia e fesoasoani mai i lo matou vaivai. Amene

**ASO SA IUNI 11, 2023**

**MATAUPU 20: "MANAVA OLA A LE ATUA" (God's breath)**

**TUSI FAITAU:** Salamo 33

**SINI:** Ia ma'ea le mataupu ua mautinoa i loto o le fanau le mafua'aga e ala ai ona taua le manava ola a le Atua.

**FESOASOANI MO FAIAOGA:**

Malo lava le galulue fa'afetai le onosa'i i le fa'atinoina o faiva ua valaauina i ai lo outou soifua e le Atua. Ia feso'ota'i pea le mataupu ma le tusi faitau e tusa ma lona fa'amatalaina, o le mea lava lea e taua ai lava le lua mafutaga ma le tusi faitau, ia lava pea le taimi e saili'ili i ai ina ia fa'alautele ai pea le malamalama'aga e fa'amatala ai le mataupu. Ia manuia le tapenaga.

**SINA FA'ASOA MO LE MATAUPU:**

O le lagi ma le lalolagi o lo'o tatou ola ai nei, o a le Atua lea. O mea uma o lo'o i le lau'ele'ele ma le sami, o meaalofa ia mo le tagata ola e tatau lava ona fa'aoga tatau ma ia tausii fa'alelei. O le taualuga lava o le foafoaga pa'ia a le Atua, o le tagata. O le ola o lo'o e ola ma ou ola ai nei, o le manava ola e pa'ia mai le Atua. O le tagata lava ia na o le efuefu o le 'ele'ele. Ae ua mafua ona ola, ona o le manava ola a le Atua e pa'ia na manavaina i ona poga'i-isu, ona ola ai lea o le tagata. O le mea lena e tatau ai pea e tagata ola uma ua manava i le ola a le Atua, ona ola fa'apa'iaina.

O le uiga foi lea o upu a le fai-Salamo o lo'o aumai i le tusi faitau o le tatou mataupu o lenei aso. O le agaga fa'afetai ma le fa'amanu i le Atua, ona o lona alofa ma lona agalelei i le tagata, o lo'o amata lava upu a le fai-Salamo i le viiga o le Atua. O le finagalo o le Atua, e le gata ina lagiina pesega ma fai viiga i le Alii, fai foi tapuaiga i le Atua, a ia iloa foi i loto ma agaga, o fa'atinoga ma galuega a tagata lo latou ola vivii i le Atua i o latou olaga atoa. E tatau ona o fa'atasi le talitonu po'o le fa'atuatuga o le tagata i le Atua ma fa'atinoga e atagia ai le moni o lona fa'atuatuga. E le na ona folafola o le fa'atuatuga, ae gaogaoii ni galuega ma leaga le loto.

O le fuaiupu e 4-5, “Ua faia e ia ana galuega uma i le fa’amaoni. E fiafia o ia i le amiotonu ma le fa’amasinoga; ua tumu le lalolagi i le alofa o le Atua.” O le uiga o lea manatu o le fai-Salamo, ia fua le ola galue o le tagata i le galue fa’amaoni a le Atua. O le fa’amaoni, amiotonu, fa’amasinoga ma le alofa, o molimau vaaia ia o le Atua e tatau ona atagia i loto, agaga ma galuega fa’atino a le tagata ola ina ia viia ai le Atua. E le o le fai tau ina ia fai se auaunaga, pe fai fa’atafulu foi le ola ofoina atu. A ia fai e fua i le alofa fa’amaoni mai o le Atua i le tagata na ia faia. O mea ia e mata’itu e le Atua i lou soifua ma lo tatou ola ofoina atu ma o tatou ola tautua mo ia i so’o se tofiga ua valauina i ai i tatou.

O lo’o fa’amatala e le fai-Salamo le Atua, o le Atua foafoa. “O le afioga a le Atua na faia ai le lagi; ma ‘au uma o i ai; na fai i le manava a lona fofoga.” (f.6). Ona soso’o ai loa lea ma lana valaau “Ia matata’u i le Alii atoa uma le lalolagi; ia fefefe lava ia te ia o outou o e nonofo i le atu laulau.” Ona o le pule aoao a le Atua i mea uma e o’o lava i le tagata, o lea e tatau ai ona ola matata’u ma ola fefefe mea uma i le Atua. Fai ma le molimau a le fai-Salamo “E tu le pule a le Alii e o’o i le fa’avavau; o mafaufauga a lona finagalo e a le tu e a le tu lava” O le finagalo fai to’atasi o le Atua, ma le tofa atamai o le Atua, e le fa’aluaia pe taupulea e se tasi. E tu to’atasi lava lana pule ma lona finagalo.

### **A’OA’OGA:**

1. Ia faia mea uma mo le viiga o le Atua a le o le tagata.
2. Ia fua le ola galue o le tagata i le galue fa’amaoni a le Atua.
3. E tatau ona matata’u tagata uma i le Atua, aua o ia o le Mataisau o mea uma.

### **Galuega Fa’atino:**

1. O le a le uiga o le fuaitau e fa’apea, “**e a le tu e a le tu lava**”?

**Tali:** O lona uiga, e tutasi le pule a le Atua e o’o lava i le fa’avavau.

2. O a uiga e tatau ona atagia i loto, agaga ma galuega a le tagata ina ia via ai le Atua?

**Tali:** O le fa’amaoni, amiotonu, fa’amasinoga ma le alofa.

3. O le a se a’oa’oga taua sa e maua mai i le mataupu sa fa’amatalaina?

**Pese:** #82 Pese ma Viiga

**Tatalo:** Le Atua e, o lau Afio e te silafia mea uma, ia e fa’atonutonu mai i o matou ala uma, ia e fa’amalosi mai pe a o matou vaivai. Ma ia e fa’aaogaina lo matou ola, e fai ma taulaga i lau Afio i so’o se ala o lou finagalo. Amene.

**ASO SA IUNI 18, 2023 (Aso Sa o Tama)**

**MATAUPU 21: “TELE MEA TOU TE NONOFO AI” (Many dwelling places)**

**TUSI FAITAU:** Ioane 14: 1-7

**SINI:** Ia malamalama le vasega i le taua o upu a Iesu na ia fetalai ai i lona au so’o, a’o sauni e tu’ua i latou.

### **FESOASOANI MO FAIAOGA:**

Talu ai o le Aso Sa lenei o Tama, e momoli atu ai fa’amanuiaga mo le aso fa’apitoa o nai Tama, i le Tama o le galuega fa’apea Tama uma o le aulotu. Ia manuia faiva ma tiute ua valaauina i ai lo outou soifua e le Atua.

Ua tatou o'o mai i le si'ui o le tatou galuega fa'a-faiaoga Aso Sa o le afa muamua o lenei tausaga. E fa'amalo atu ai i lo outou taupati i le fa'atinoina o la outou foi pitolaau, o le toe mataupu lea o lenei Masina aemaise lenei afa muamua o lo'o tatou i ai. E lelei foi ona fa'aavanoa se taimi e toe fa'amanatu ai mataupu uma, ina ia tapena ai mo le suega fa'ai'u i le Aso Sa o muamua. Ia manuia tele le tapenaga.

### **SINA FA'ASOA MO LE MATAUPU:**

O le tatou mataupu o lenei Aso Sa, o le vaega muamua lea o upu fa'amafanafana a Iesu mo lona au so'o. O le itu taua foi ia iloa, o le sauni o Iesu e tu'ua le mafutaga ma lona au so'o, o lona uiga ua mavae lona toetu mai manumalo. O lo'o amata lava upu a Iesu i lona fa'apea atu i le fuaiupu 1, "Aua le atuatuvaale o outou loto, ia outou fa'atuatua i le Atua, ia fa'atuatua mai foi ia te a'u." O lona uiga o le manatu o Iesu ma lona agaga atoa; Muamua; ina ne'i tausuai ona so'o, pe a alu ese fa'afuase'i e aunoa ma sana upu. Lua; Ina ia nofo sauni ai le au so'o i taimi o le a alu ese ai lo latou matai, aua e i ai mea e tutupu. Tolu, ia fai ma fa'amaoniga i le au so'o, o lona alu ese, o le a afio ifo ai lo latou fesoasoani sili, o le Agaga Paia.

O le si'ui o le galuega a le Alii ma ua avatu ana upu taumavae a'o ni fa'atonuga tu'u sa'o mo ona so'o. O le fa'amanatu ia aua le fefefe, a ia maua'a lo latou fa'atuatua ma ia tumau i le tala lelei na a'oa'oina ai e Iesu. Ia latou fa'alagolago foi ma talitonu i mea uma na folafolaina atu. Ua fa'a'ailoa e Iesu le moni o mea uma na tutupu i la latou mafutaga. O le fa'alototele atu o Iesu mo lona au so'o, e ui o le a tu'ua le mafutaga ae le tu'ulafoa'ina i latou e le Tama. O le uiga o lea manatu, o le Atua o le Tama o tagata uma e o'o foi ia Iesu na ia fa'alagolago lava i lona Tama, o le Atua lea. O Tama, o le ulu i totonu o tatou aiga, e ave uma i ai le fa'atuatua a le Tina ma le fanau i lana ta'ita'iga, e o'o lava foi i so'o se fa'alapotopotoga. E tatau lava la ona tatou ususita'i ma fa'alogi i le Tama ae sili ai ona tatou usita'i i lo tatou Tama sili, o le Atua lea. O le Tama foi, o le sui va'ia lea o le Atua i totonu o tatou aiga. O lona uiga, so'o se Tama lava, e tatau ona atagia ai uiga fa'a-le-Atua i lana ta'ita'iga, ona maua lea o le fealofani ma le maopoopoga. Fai mai Toma ia Iesu, 'pe fa'apefea ona matou iloa ou ala' na tali Iesu, "O a'u nei le ala, ma le upu moni, ma le ola; e le alu atu lava se tasi i le Tama, pe a le ui mai ia te a'u."

### **A'OA'OGA:**

1. E le tu'ulafoa'ia i tatou e le Atua i lana galuega.
2. E taua le ta'ita'iga a o tatou Tama i totonu o aiga.
3. Aua tatou te popole i se mea e tasi, a ia tatou fa'atuatua ma le mautinoa i le Atua.

### **GALUEGA FA'ATINO: Tusiga solo**

1. Tu'u le avanoa i le vasega e tusi mai ai a latou solo e fa'ata'u i o latou Tama.

**Pese:** Tama, Tama po'o ua e sauni ea.

Ua e sauni ea, ua e sauni ea

I lou aso taua.

Fa'amalo atu lava mo le fa'atinoina o outou faiva I lenei Aso Sa, o le tatalo ia maua pea lo outou malosia aua tiute o feagai ai ma outou. Ia saunia e le Faiaoga le tatalo e fa'ai'u ai le vasega.

***IA MANUIA LE ASO SA O TAMA!!***

\*\*\*\*\*

**ASO SA IUNI 25, 2023**

**MATAUPU 22: “SUEGA O LE AFA TAUSAGA”**

**SINI:** Ia su'esu'eina o latou mafaufau i tala o le Tusi Paia sa fa'amatalaina i mataupu o le afa muamua o lenei tausaga, ma ia maua ai pea le mautinoa i fanau e tusa ma lo latou o mai i le aoga Aso Sa.

**FESOASOANI MO FAIAOGA:**

O le tatou suega fa'ai'u lenei o le afa muamua o lenei tausaga, e ta'ilua mai fesili i le mataupu, ae le taofia ai le fa'aopoopo pe ave'ese foi o nisi fesili. E tu'u atu pea i le faitalia o faiaoga i le faiga e fai ai, ae ua na'o se ata ua auvatu e fa'atino ai a tatou suega. Ia ma sauni ni nai fa'ailoga mo nai fanau.

**Fesili ma Tali:**

1. O le savaliga a Iesu I Ierusalem sa maua ai e Sakaio le fa'aolataga mo ia ma lona aiga. (Sa'o & Sese)

**Tali:** Sa'o

2. O Sakaio o le Iutaia mao'i lava o ia. (Sa'o & Sese)

**Tali:** Sa'o

3. O le a foi le fuaitau fa'a-Iutaia lea na fa'a-sese e le Atua?

**Tali:** E 'ai e matua le vine moto, ae magiagia ai nifo o le fanau.

4. O le a le mea sili I le Atua?

**Tali:** O le faia o mea uma ma le fa'amaoni ma le loto malie

5. O le tiute o le fanau o le usita'i ma fa'alogu, ia alofa i matua ma ia alofa foi i le Atua. (Sa'o & Sese)

**Tali:** Sa'o

6. O le malala ola I laugutu o le Perofeta o Isaia, o le fa'ailoga o le fa'apaiaina ma le fa'amamaina o agasala ae alu e fa'ataunu'u le valaauina. (Sa'o & Sese)

**Tali:** Sa'o

7. O le a le uiga o le tasi ia Keriso?

**Tali:** Ia tasi i la le fa'atuatua.

8. Aisea na mafua ai ona tusi fa'apea upu a le aposetolo ia Kalatia?

**Tali:** Ona ua leai se tasi ia Kalatia.

9. Ola fa'afoliga. O se uiga lelei lea e tatau ona ola ai le tagata?

**Tali:** E leai

10. O ai tagata ia e maua ai uiga ia e tusa o le tala sa fa'amatalaina?

**Tali:** O le au faresaio

11. O le tala i le fafine ma le fagu alapasa sa ia tata'e ma ua ia fa'aoga e u'u ai le ao o Iesu i le u'u e sili ona manogi ma taugata. O le silasila a Iesu o se mea lelei tele ua faia e le fafine mo ia. (Sa'o & Sese)

**Tali:** Sa'o

12. I le tala lava lea ma le galuega na fai e le fafine, fai mai na tiga ai loto o le au so'o. (Sa'o & Sese)

**Tali:** Sa'o

13. O ai na fa'amalolo e Iesu i lana savaliga i Ierusalema?

**Tali:** O le tauaso ma Sakaio le ao lafoga.

14. A'o le a ute o faigamea e ala i le savaliga a Iesu e tusa ma le tala?

**Tali:** O le ute o faigamea o le savaliga a Iesu Ierusalema, ua maua ai le fa'aolataga mo tagata uma.

15. O tala ma'ai i le tino, o lo'o fa'asino i puapuaga na o'o ia Iesu e pei ona ta'ua e Paulo, ae fa'apea foi puapuaga sa feagai ma ia. (Sa'o & Sese)

**Tali:** Sa'o

16. E ala ona mitamita Paulo i puapuaga ma faigata, aua ua ia o'o i ai ma ua maua'a ai lona fa'atuatua i le Atua. (Sa'o & Sese)

**Tali:** Sa'o

17. O a fua o le Agaga e pei ona ta'ua e Paulo?

**Tali:** O le olioli, o le alofa, o le filemu, o le onosa'i, o le mataalofa, o le agamalu, o le amio mama.

18. O a amio a le tino e pei ona ta'ua e le aposetolo e leaga ai le tagata?

**Tali:** O le amio leaga, faita'aga, losilosile vale, tu'inaanau, o le matape'ape'a, o le mataaitu, ma isi uiga mataga.

19. O le a le igoa o le fatafaitaulaga na fa'atuina e Mose ina ua manumalo i le taua ma Amaleka?

**Tali:** O le Atua o lo'u tagavai ia.

20. Tusi mai ia le silia ma le laupepa e tasi. Fa'amatala mai se mea taua na e maua mai i le tele o mataupu po'o tala mai le Tusi Paia sa fa'amatalaina.

**FA'AMALO LAVA LE GALULUE FA'AFETA'I LE ONOSA'I E ALA I LE FA'ATINOINA  
O OUTOU FAIVA UA VALAAUINA IAI LO OUTOU SOIFUA. IA FA'AMANUIA TELE  
LE ATUA. IA MANUIA TELE LE ALO ATU MO LE MALOLOGA I LE AFA MUAMUA  
O LENEI TAUSAGA, TATOU TOE FEILOA'I I LE ALOFA O LE ATUA.**

